

T. 5241.16/7266(8)

75241.16/7266(8)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
NOV 30 1940

中州名賢文表卷第二十七

內集

哈佛大學漢和圖書館珍藏印

姑蘇劉昌欽謨

王文定公

秋澗集

碑誌

大都復虞帝廟碑

幽陵之祠虞帝所從來綿邈廟據金故苑西北維兵後廢

不治獨唐貞元間復廟碑宛在顏真卿子顏書人屢欲易去礮焉以

它用主者心懍恍若有儆動迺已厥後道士陳志玄直廟

西百舉武起真陽觀為長春別院復購焉約不犯元刻用

石背勒營建本始備力來徙碑與跌坼身挺植重不克舉

仆道士惕息磬折向碑祝曰今神顯思若是願置安處且

遠荒穢尚敢他用以黷聖靈神惟降監庶畢茲志安載而

去吁亦異哉初樞密趙公良弼嘗建學宮於鄉縣求志玄
為工師既迄功以徙碑事蹟來告公曰嗚呼噫嘻皇乎休
哉惟帝明德萬古是式况冀土茫茫析而為幽州者帝之
所經畫宜乎燕人祠饗不忘廟屢廢而旋復也又遺碑歸
然自唐歷五代遼金當大元戊寅凡五百有餘歲神物護
持俾勿懷汝歸興復之責不在師乎志玄曰唯即以道宮
不構作新廟而奉黼宸焉既而趙公將志玄之懇以復廟
記見屬某拜手稽首而颺言曰日月星辰帝玄明也君臣
父子帝舜倫也山川風土帝疆域也是則聲教所暨巍巍
乎與天地同休孰能名而能報哉今志玄黃冠師因趙公
一言而復數百年之舊俾來者瞻天就日知慕帝德如蟻
之赴羶可謂推原道本敬其所當敬乃知天理之在人心

者曾一息而間斷邪至於稽古樂善因機就功毗贊皇猷
思成比封之美又以見趙公事君治民孳孳焉以堯舜之
道存其心者也誠宜特書以詔來哲仍繫樂章使都人歲
時祀饗登以歌焉其詞曰

帝降諸馮東方人兮幽幽深山鹿豕羣兮耕稼陶漁至為
帝兮風動八區烝一乂兮矧惟析津帝經制兮物不苦窳
化土泥兮聖靈在天濡鴻私兮阜財解愠南薰時兮鳶飛
魚躍日用而不知兮風移俗變天理存歟彛兮燕人懷思
歆明德而祠兮八音庭陳鳳來儀兮九疑雲深望何依兮
我賡九歌言匪空兮皇天降衷克綏惟帝聰兮恫彼下民
中庸其鮮充兮嗚呼而能一天下之慮允執其中兮

平陽府臨汾縣重修后土廟碑

平陽府治之西有鄉曰晉源帶汾河表姑射林墟櫛比泉
流交貫無寸壤閑曠山霏夕景杳藹如畫故河東稱膏腴
勝槩之地於斯為最風俗率勤儉盡地利憂深思遠有陶
唐之遺化焉用是富庶而事神報本之禮尤恪歲時覃出
惟恐居後豈終歲之勞一日蜡者之意歟樊氏里后土祠
其來浸邈蒼煙喬木輪囷離披已百餘年物也兵燼來雖
正寢巋然日就蕪圯里中父老某等問其若是乃諭於眾
曰吾黨仰滋天休取足厚載歲比豐穰人用樂胥可不知
其自邪今神庭未備不足妥靈揭虔其謂我何咸儆懼聞
命相與經畫起廢完故益新智者作其謀富者資其用取
材於河陶甃於野礪礎於山然後工者輸乎巧壯者服其
役營務既興先後有敘於是繚重垣建臺門作重寢列兩

序樹庭屏凡三十八楹丹刻翬飛輪煥離立其配侍法從
之屬旒纛儀衛之數金碧絢爛森布左右莫不畢備游人
過客載瞻載儀溪山草木亦為動色凡費泉幣僅萬疋既
落成某人等以禮幣求文於予將以幽贊神明紀夫廟貌
興衰之自謹按汾陰后土祠乃魏鄧丘之制其典秩華縟
肇於漢武元鼎行幸之初千載而下令人歌秋風之辭詠
汾陰之曲想夫泛樓船濟汾河千乘萬騎威靈振赫回旌
踟躕躬祀睢上祈穀報功於是乎在故歷代因仍以為聲
明盛事曠古當然之典是則崇奉者國家之事非鄉民所
得擬也以理究之神睢者即有國之大社而社者自天子
至於鄉遂皆得置而通祀第禮文制節有隆殺之異爾況
土為神廣大博厚無所往而不在又汾陰在晉為屬邑以

中州文表卷第三十一
茲為離宮異館神游美報之所其誰曰不然嗚呼三代已
降教化衰而禮樂廢禮樂廢而祀典亡林林總總之民物
則既戕心惑所嚮有射利徼福而已故祀非其類僥倖於
萬一者胡可勝數今冀方之民獨能敦本返始奉所當祀
俾歷世相承之俗敬恭誠潔永永是尊以荅高廩無疆之
休較夫淫祀野祭者可謂知所嚮矣乃為作送迎神辭春
祈秋報歌以祀云其辭曰
汾流兮容與林葩兮綉組被汾兮一曲坎坎兮擊鼓薦瓊
芳奠桂醑俟神來欣樂胥芳菲菲兮滿堂偃金枝兮翠羽
報神德兮德何溥

右迎神

澹林扃兮山煙乘回風兮雲輶神欲旋兮何邁奄上征兮

朝元衆紛舞兮羅拜欲神留兮無言望極浦兮渺渺愁予
目兮娟娟神篤我祐兮歲有年

右送神

絳州重修夫子廟碑

絳為州甚劇其地蓄河山之潤總六縣以三萬戶為河東
冠俗剛儉尚氣義奄焉有三晉餘習州治民廬高下覆壓
蟠踞枕跨岡陵是依獨夫子廟學據城之東北隅爽朗夷
衍奠澤宮甚宜而素汾北來盤折容與帶郡城而西望之
一泮水然廢撤既久莽為榛墟逮州將艘澤郭公來始圖
興復遂起大成殿泮宮門各三楹甫朽棧而公卒漠然狼
藉者蓋三年於茲噫將有待而然邪至元九年秋奉議馬
公來尹斯郡既謁告顧瞻咨嗟憫夫垂成之功日就彫剝

乃以完故益新爲任於是完正殿壯臺門創兩序凡就屋
五十餘楹層棟軒翥墀陛整削松栢有舄碩碩其庭中設
素王像以顏孟十哲配侍左右東西兩廡繪六十二子及
大儒二十有四袞冕皞裳峨峨奉璋奎壁輝映煥焉有光
廟旣成適選舉令下士子來歸洋洋滿岸旣而衆議以州
之治化及民者非一其大者著者可無聞於後來謁文於
余因勉爲撰述且寓夫子之所感焉嗚呼三代之治道莫
先於教學無重於育材材弗育則用乏其人民失化則不
明乎善善不明則民入於僻民蕩於僻則幾何不爲禽犢
也哀哉欲求吏之良政之善胡可得已若夫天地縕細山
川開闔蟠精粹靈非有今昔醇醪之間人之秉彝具存天
之生材不乏然氣之不充俗之不美者特以教之無素養

之未至耳今國家崇聖道開化源建辟廡於京師立學師
於鄉遂顓本業者復其身鳴一藝者無不庸是則大易人
文之化菁莪樂育之方靡不備至奈何吏治者鮮推其本
以簿書獄訟是務爲士者不思根極聖道以大學自任區
區從事於章句之末是不副上之所求所望焉而曰道不
明秦無人也宜矣尹蚤以學術侍彤庭歷臺閣熟其然故
下車之初首事學校作新士民耳目至成就若爾可謂能
也已尹諱

曰

郡人旣書其興建本末而繫之以詩其辭

厥初生民秉彝昭融物慾外遷良心蔽蒙於鑠元聖乃大
有覺何効何則而先乎學吁嗟叔世降及漢唐道統湮微
絺文繪章士鶩空言吏昧厥治朝夕孜孜匪不摩勵科學

異端簿書期會愚者不及淪於自棄聖不世出發越道源
糝糠虛文浩浩其天廟宮之建序庠是宣穆穆睿思意茲
在焉而吏而士尚克勉旃盤盤闕宮完故益新馬公之功
本既立矣道由生矣眎為餼羊乃予之恥

絳州曲沃縣新修宣聖廟碑

曲沃縣學舊矣始完於宋嘉祐初盛於金泰和間貞祐之
兵蕩焉無餘前政苟訛初不遑卹園蔬興感薪刈其下者
幾五十祀逮至元己巳邑尹石抹公慨然以圖復為事工
垂構而去尹侯簿賈天衢相與顧歎曰蕭武弁能是烏可
不卒其美然澤宮故地庫陋湫隘不足奠安神觀聳邦民
瞻相治城西北陬勢夷且爽遂增崇前規而敞其禮殿焉
既落成董事者許良等感蕭君經始之勤今政贊終之善

來謁文將刻石廟庭俾遙名於孫曹諸賢之列用垂示來
哲竊不自揆敢以聖道之隆污廟學之本末互陳而歷告
之三代之世家有塾黨有庠術有序國有學以師以令肄
俊造其中時書歲考小大有成然後賓而興之其典則六
德六行其藝則禮樂射御書數然不可不知其所自故聖
學釋菜奠幣於先聖先師示不忘本也彼朝夕見瞻無非
智仁聖義忠和孝友睦婣任卹之方凡邪說詖行放蕩僻
異之術非可輔世教明人倫者率屏絕不容髮其間故三
代道出一致有學而無廟周衰王者迹熄生民不被庠序
之教天理茫昧心喪厥守異端百家之說乘隙竝鶩不無
厖雜壅底之蔽此太史公讀功令未嘗不廢書而嘆也及
漢興學館林如鴻儒繼作師傳業受學古蒞官守其說而

不易故謀王體斷國論一以經旨為據於時公卿大夫士
吏文學氣節雲蒸霧散彬彬然幾三代之風何其盛哉此
無他聖道明而百家自息也逮魏晉隋唐以來慕高尚者
以虛無為宗干利祿者以科舉為業其視窮理正心修己
治人之道懵不知為何事時則三物之教弗明於上先王
之澤不及乎下單為廟祀尊孔氏而王之三代教育之實
泯泯掃地矣所謂有廟而無學間有卓越特達之士出芟
夷浮學羽翼聖道為任然莫能拯起其弊而全濟其溺者
何哉蓋道之隆污學之盛衰一繫夫王政好尚而為之有
無也嗚呼三代吾不得而見之得見兩漢斯可矣今國家
昭至德建民極勸學敦農崇化厲賢凡所以風四方而開
太平之基者靡不興舉故經明行修之士往往賓興天府

擢位卿相以心正意誠國治天下平之道已嘗佐天子而
理百官矣士之不志於古則已苟志於古舍斯時之易將
何所求所待焉曲沃自昔以劇稱土腴物阜為絳諸縣甲
俗剛僉力穡尚氣義憂深思遠奄焉有唐晉餘烈尤不可
後者教也本既立矣道由生矣師帥者能仰體上之所嚮
以明倫實教作新士民耳目俾知所以學異時人材輩出
斌斌然追兩漢之風孰謂不張本於斯邪不然釣采華名
為餽牽告朔之所吾不知其可也銘曰
維晉曲沃以劇稱絳山左戒汾右傾山川開闔氣上蒸風
俗勤儉餘剛稜邑居萬家業有恆既富而教迺世程嗚呼
庠序教所生石君作尹追良能奉宣德化根以誠清廟起
廢功勃興心計百至經載營惜哉垂構任遽更後人繼之

卒有成方華古礎排巨楹文榱藻棟浮雲縈相前增崇尤
克承教其鋪敦道日弘春風隱耳絃歌聲始謀贊終匪自
矜吏民懷感思以銘我詩刻石碑廟庭

解州聞喜縣重修廟學碑銘

堯舜用道以治天下孔子任道以垂萬世其所以明倫建
極論政造士邇說遠懷者不外夫術有序國有學而已後
之君人者思欲化隆唐虞坐收牖易之道舍夫子之教將
安法歟我國家尊師重道明德新民風動海寓爰自京師
達於郡邑鄉遂率建教官勉士以德趨民於學其比隆致
治之意固云極矣而承宣鼓舞寔守令之職是則道生之
本教始之基其可後而聞喜在秦曰左邑桐鄉逮漢元鼎
間始易今名其為縣漫董澤奠鳴條雄盤遠帶風土夷沃

通晉走蒲古為咽會名卿碩德代不乏人顧山川之氣鍾
靈萃秀必自人文德化薰陶涵浸者爾縣廟學舊矣枕城
之艮隅地勢穹窿如神龜負圖背露淵水蒼官蒼鬱環列
庭祀秋煙古色望之儼然皆數百年物也按廟碑由宋迄
金宰是邑者增崇非一故制度宏麗甲於諸縣遷革已來
神栖碑屋幸脫煨燼然歲年緜邈人迹罕至浸淫於壤藪
草棘而宅狐狸蓋有年於茲至元己巳從仕郎張君來尹
是縣首以營治為任既而監縣事脫台簿司天祿佐史劉
瑞爭出廩料資所費而濟厥媿如榱棟楹櫨之傾腐者瓴
甌階陛之缺裂者舉易而新之復起講肄之堂齋廬之位
至於神門庖庫畦圃游息之所莫不畢備用十年春二月
釋菜禮告成厥功百年偉觀頓還於舊粵明年春史劉瑞

介汾西前尹王延年持溫國文正公學記踵門而請曰不
腆敝邑猥致力於鄉校功甫儻而尹適去烏可俾上官之
善藐焉無聞於後以職以分瑞也寔任其責擬揭諸麗石
以告來哲不肖素陋於文以懇請堅切辭不能已敢勉爲
書之又竊喜幸得列名於司馬公之下風固所願也尹晉
州臨汾人諱仲祥資明良果於從政故其爲善卓卓有成
也如是較夫從事於簿書期會之末者不曰有志於本知
教之所基者歟誠可歌也已其辭曰

維漢聞喜古桐鄉東浸董澤南條岡千年喬木秋煙蒼廟
宮盤盤枕良方平時絃誦溢兩庠代不乏賢古明良如儉
顯魏度相唐風雲感會龍虎驤至今德業何昭彰神居雖
存地土荒蒿萊没人狐兔藏風雲穿漏摧棟梁張君下車

心慨傷首以營治如弗遑同寮見義爲贊襄咨嗟吾道百
孔瘡頓還舊觀蔚有光齋廬有室講有堂我南走蒲過此
邦親覩盛事思彷徨吾儒有例善則揚作詩豈惟示不忘
士民嚮化此本張嗚呼廟碑古甘棠

重修孤竹二賢廟碑

首陽山孤竹二賢祠肇見於李唐增隆於前宋金貞祐末
爲戎兵撤而樵之國初郡人徐帥因廢基而屋焉後四十
載當至元九年亥默歲憚自御史裏行來官河東以是年
冬十有一月按部至於蒲坂適致祭令下遂齋沐奉祝祇
拜墟墓庭序藂翳路寢傾圯遺像黯昧彫剝就滅於戲前
政之不舉至於斯邪非惟不稱明詔尊顯風烈之義而大
懼不職下隕教條吏隲不恭惡可徇狃於是祇會屬吏作

新是圖資聚既營衆工趨事仍命府掾長吳舉董治厥役
改新肖像以儼神儀逮明年夏五月復行縣次蒲吏告訖
功用六月丁亥躬率僚屬以少牢之奠敬安神棲帶河表
華新宮敞然山煙庭木奕奕動色守吏不任之責庶乎其
少塞矣知府楊居寬請書其事於石以詔來者噫二賢聖
之清者也其出處大節求仁本心興懦厲貪之操息邪懼
亂之功孔孟稱之詳矣揭若日月亘終古而不熄小子其
敢擬諸然讀黃太史所述去國諫伐蓋宗國有不說好事
者爲之說耳竊有所疑焉若曰非讓而逃國人惡而逐之
烏在其爲賢也且以避紂不有其位孔子何爲稱求仁得
仁子貢何以審夫子不爲衛君乎至於義抗自終恥食周
粟亦謂事不經見臧哀伯何獨稱武王克商義士猶或非

之不然二賢者北自海濱聞善養來歸當周命惟新明義
崇德之世不知俯仰何所愧怍僵踣於茲山之下乎故特
表而出之必有能辨之者仍爲蒲人作迎享神辭俾歲時
歌以祀焉辭曰

瓊靡潔兮蘭馨錯薇蔬兮薦神庭條之山兮河之水迴風
瀟瀟兮波瀾瀾神之遠游兮邇何歸南叫虞舜兮帝禹與
追以暴易暴兮吾知其非國極所欽兮祀典載熙槃非周
粒兮桂酒芬菲民之載神兮清風庶幾偃迴旆兮入室陳
鐘鼓兮載考載擊千秋兮萬歲於焉兮永息

衛州創建紫極宮碑銘

維衛紫極道宮全真師冲虛子房公所勅建也初公旣參
丘尊師於海上長春目其氣志非凡殊稱異之居無幾何

命公主馬坊之清真觀迨國朝壬寅歲聊攝趙侯請師住
持郡之玄都宮於是鶴馭東游道出敝邑汲長趙實扈林
聞師道價重一時以治城崇道里隙地廣六十舉武縱則
倍之奉師爲玄覽別館忻然許焉輟其徒張志洞等結茆
以居嘗闕地得石上刻宋太宰張邦昌詩什知爲吳越錢
氏子孫隸華庵故基也師留博僅紀而西還淇上方履滿
戶外每以居逸教無爲慮因集其徒而告曰吾大方家雖
清虛自然爲宗要以應時衍化爲重詎容山林長往歸潔
一已乎且吾行天下多矣未若衛之土中而處會俗美而
易化不於焉闡吾教尚何往然祝延寶供香火焚修之所
非大壯麗不足以張皇教基竦道俗瞻敬之心也迺命門
徒孟志玄趙志樸率衆下商洛之材跋涉艱阻以歲月得

木萬計遂建正殿七鉅楹內設三清大像示至道之原也
中起通明觀以奉玉皇黼宸欽天帝之尊也後復作七真
殿五筵敘列僊品見玄教之傳也下至壇墀神闈齋室庖
湏廡庫蔬圃莫不畢舉師素負巧思志堅而氣充規撫位
置意匠中定不待畫宮於堵而爲執用者之法要使堅完
鞏固爲數百年物尋師委蛻仙去遺命志樸等曰今大功
將集無以吾存歿而作有間勉強前修以卒吾志故志樸
等三十年間焦心勞思攻苦食澹繼述師訓猶一日然今
則繪彩供帳截然一新金光五雲絢爛溢目宏麗靖深爲
一方偉觀其工費之廣自力其力初不外假而衆忘勞焉
實經始於壬子之春迨至元甲申秋工告迄功志樸乃件
右師之行業與夫興造本末踵門磬折謁予文者再余以

鄉梓盛蹟且與師有玄談之雅勉為敘次之師諱志起維
州昌邑人幼業儒既而以異夢有覺遂入道為人氣貌魁
奇操行清峻通古今善篆籀樂與名士夫遊至於醮祭之
獲福雲鶴之顯異所在驚動世之耳目者為多遺山謂師
外朴而內敏質直而尚義似夫墨名而儒實者蓋確論云
宜其事業成就如此至元戊寅志樸以師德請於朝蒙敕
定僊號曰弘真體靜真人若志樸者於師弟子之禮始終
盡矣尚猶以師不覩道緣大成為歆予慰之曰不然昔真
人舍清真而遊博去博而終稅駕於衛今雖神游無方其
眷戀於此也必矣況共衛間名山勝境固為小有洞天如
玄元化現於仙山公和舒嘯於蘇門海蟾留題於白鶴仙
蹤靈貺前後接踵見於方志雜出於傳記之說者昭昭矣

異時馭風騎氣追陪真仙安知不過故山而留語俯華表
而增懷而為孫劉絕塵之舉也邪仍作歌詩詳見師志俾
刻諸樂石雖綿亘千祀庶幾來者有所考焉其辭曰

道家者流本靜清杳冥而無迹與形宓慈尚儉貴不爭茲
乃黃老之常經有時土苴為世程祈禳醮祭由是生像緣
教設雖強名雄樓傑觀爭崢嶸猗嗟先生起營陵魁偉德
業玄門英至人未免安僦行河山兩戒磴金庭方花古礎
排巨楹紫雲為蓋青雲城羣仙媿統須呈靈紫垣落落羅
天星先生演化意有徵後孰倦焉先此營庶用張本道可
興陰助政治歌清寧大緣未竟歛上昇門人攀慕涕雨零
歲累月積大有成惜不久視為宗盟仙宮洞房本不扃神
遊八表風泠泠來過故國宜少停紫極夜氣開蓬瀛追攀

逸駕非吾能尚想為國儲休禎風時雨若穀不螟下洗澆俗還淳誠我詩刻石何千齡要作華表歸來銘

大元國大都創建天慶寺碑銘

并序

大雄氏之為教如慈雲慧日覆燾無際惟得其人道乃大行宮居像設亦從而熾盛之我國家鼎定全燕教隆內典故精藍勝刹粧嚴寶界金碧相望有佛國大乘氣象維永泰寺肇基自遼彌陀者泰之別院也大安兵燼廢撤不存鞠為茂草者五十餘年大元至元壬申有僧雪堂者始來結菴而主之先是師業嗣法猶窟潛天德以經戒嚴機鋒峻越在雲朔名動京師嘗假息間有以天慶名所栖而告之者初不諭其故既而駙馬高唐郡王聞師名德喜之既覲止即依慈蔭扣真詮師順事隨方日有所覺以至承噴

獲譴非罪而罹苦毒者因聞一言多所縱釋其後王請師住豐之法藏院仍贈貝錦法衣用著顯異尋以道行上聞有詔所在護持及觀光大都郡王迺出重幣易是院為師待問駐錫之所與其徒奉香火修潔精進而已至於建大道場擴充無量功德蓋遵養而有俟也逮甲申冬皇孫紺麻刺以師持誦保釐故欲辟靜室處之官府辭不可翼日出貨泉二千五百緡洎名驃二仍諭留守段禎詹事丞張九思即所居庀徒藏事起三大士正殿又室七巨楹下至門閭庖湏賓客之所略皆完美始於乙酉之春成於丙戌秋仲役初作闕地得廢鍾所刻天慶二字考之蓋有遼建號也事夢既協即為新寺名額於是倚睥像於金光沸潮音於空際有來諸天普臨雙樹顧諟永泰廢餘復為清涼

法觀矣後三歲奉皇孫奩香禮江浙名刹起造藏經師冒涉江湖往返萬里存神過化高風所及奔走供養且有金仙通靈茹藍主護之應吁亦異哉凡得經四藏計二萬八千餘卷分貯大都之開泰天慶汴洛之惠安法祥及永豐法藏院仍以法物付之使人無南北通暢玄風壽聖皇贊寶緒天花雨紛梵唱雷動日開八方之供者此師之所圖惟也宜其經來神衛號應基先雖老柏重榮神松回指有不是過者遂不千里遠持待制王之綱事狀以寺碑來請曰山僧空疎無足比數以義以契尚憲使與顧以銘章貺之始終之願畢矣予以師熹儒學有器識所交皆藩維大臣文武豪士緩急於士大夫周旋不榮悴間解紛振乏要有實效然去來其間殆雲凝而風休也嘗即寺雅集自鹿

菴左山二大老已下至野齋東林凡一十九人作爲文字道其不凡時方之廬阜蓮社云是亦將因儒釋僧之特達者也宜其行業成就如此固可以著金石而垂不朽矣師諱普仁字仲山姓張氏雪堂其道號也世爲許昌人父世榮官至豐州司錄叅軍母夾谷氏師生有徵祥甫毀齒不葷酒齋初祝髮於壽峰湛老再具戒於竹林雲和尚及參永泰贊公一見器異即蒙印可至有機鋒灑落瑩徹冰輪頭角崢嶸光騰星緯之諭贊派出臨濟第而上之師乃慧照十九代孫也過鎮陽樹碑表行濬源接派以昭真本於尊祖追遠光又赫焉余嘗論天下之事雖小大有殊疇酢注措皆有本末就釋氏教論之佛法者本也塔廟者末也崇其末而遺其本求進於道亦以難矣若師也可謂持用

有方審所先後者哉乃隨讚歎而作偈曰
道之大原出於天物生而靜乃本然扶持有術繫後傳惟
聖日遠湮其言奪攘矯虔紛目前佛乘自西來竺乾慈愍
濟度心為先衆生迷惑不知覺沈溺苦海甘流連人人安
得以手濟以法為柁經為船奉持頂戴破黑業火宅變幻
生青蓮龍宮紺殿儘瞻禮貝香須滿黃金田阿師振錫下
南海豈為頭角爭昂軒向來四萬八千偈重與震旦開經
筵燕豐汴洛還舊貫佛界珠網搖秋煙群昏再曉栖至善
如夢日月金沙洲漢人得經纔四十未若此舉思無邊功
圓行滿師不有歸之帝孫祈永年八方奠枕磐石靖天子
萬壽南山堅聖孫神子麗不億惟城惟藩復惟宣歸來丈
室炷香坐但覺鐘鼓清而圓從此婆羅雙樹底知師澄定

草鞵禪

渾源劉氏世德碑

并序

金源氏崛起海東當天會間方域甫定即設科取士急於
得賢故文風振而人材輩出治具張而紀綱不紊有國雖
餘百年典章文物至比隆唐宋之盛若夫篤志力學挾藝
應選首破天荒魁冠多士父子昆季相繼擢第為名士夫
作良牧守文行端雅門第清峻為金朝第一流者其惟渾
源劉氏乎劉氏出彭城望族五季板蕩播遷朔土遼末遠
祖諱用者居弘州順聖縣之耀武關世業耕稼生子翰贈
承德郎配張氏追封彭城郡太君生撫字仲謙即今監察
御史鄰之高祖也始釋耒耜習進士業當遼金擾攘際學
未嘗一日廢天會二年肇闢科場公以詞賦第一人中選

中選惟遼以科舉為儒學極致文體龐雜萎蕪視晚唐五代尤為卑下公勵精種學文辭卓然天成妙絕當世一掃假貸剽切牽合補綴之弊其後學者如孟宗獻趙樞張景仁鄭子昉皆取法焉金國一代詞學精切得人為盛由公有以振而起之也釋褐右拾遺轉知天城陽曲懷仁三縣擢大理正遷平陽府判官安東節度副使兩貳大理寺出刺石州累官中大夫年六十三卒於位翰林學士張景仁碑其神道公性淳厚見義固執待物誠好誘掖後進三為理官議獄主恕不屈於權貴故多平反尤長於治民興利除害若嗜欲然施設有條理簡便可持久所去見思圖形奉事素愛渾源山水幽勝買田家焉晚號南山翁夫人渾源雷氏北京轉運使思之女封彭城郡君生四子曰汲曰

渭曰滂早世曰濬汲字伯深穎悟絕人早傳家學與弟渭同擢天德三年進士屢為州縣有聲累官朝散大夫應奉翰林文字西京路轉運司都勾判官平生寡合不羈慕郭林宗黃叔度之為人晚節倦於游宦放浪山水間以遣興讀書為樂稱西崑子述壽藏記敘其行已甚悉卒年五十八鄆王府文學陳訥銘其墓有西崑集行於世屏山李之純引其端娶曹氏追封彭城縣君一子偁字稚川大定十年進士第積資奉直大夫豐王府文學兼記室叅軍孫一從夔字和卿奉職出身善作詩曾孫文祖渭字仲清少好學克紹箕裘既登第授承德郎知秦州隴城寨事調隰州軍事判官終朝列大夫岢嵐州刺史號
老人一子价河水泊酒監曰濬迺鄰之曾祖博學強記少有聲場屋間

既而用廕入仕至安遠大將軍饒陽令配張氏封彭城縣
君生四子似似儼侯似字稚行宣武將軍真定府軍資庫
使三子從善字澤卿彰德府酒監從臯字平卿從契字禮
卿武義將軍克勝軍副都統孫五人曰郊義武將軍曰郅
等俱早世似字稚章孝敬友愛出於天性力學能文稱其
家聲四試於庭不偶用恩賜第授承仕郎華州教授再任
承直郎主沂水縣簿娶王氏封彭城郡太君壽五十五終
於家遺文雄深簡古有迺祖風嘗訓子孫曰爲士當先行
檢如絲之潔將立其身慎無點汙汝佩吾言則無忝矣故
屏山李純甫表其窀曰善人劉公之墓其爲士夫之紀蓋
可見矣一子從益字雲卿自髫髻時已有成人度擢大安
元年進士乙科調鄆陽丞長葛簿陳州防禦判官皆有治

績投機應變措畫出衆意表進提舉南京路權貨事丁沂
水君憂起復拜監察御史君負材尚氣資之以學欲使事
業表表大見於世一旦職與志合所言朝廷紀綱時政利
病竟與宰臣辨論得失不屈去職閒居淮陽與諸生講明
伊洛學久之選令葉縣至則鋤強剔蠹豪族惡黨禁不敢
少肆請免逋租三萬石致流民自歸者口數千大起孔子
廟旣樹教本集諸生肄習其中風化大行考課爲河南最
未幾詔入翰林爲應奉不踰月而卒得年四十有四雷御
史淵誌其墓趙翰林秉文勒銘神道皆稱其器識明敏剛
直敢言學可以輔政教材足以濟時艱齋志以歿士論惜
焉葉民至廟而祀之孔子稱遺直遺愛者豈近是邪蓬門
其自號也蓋取南山翁誠子詩元自蓬蒿出門戶莫交門

戶部萬蓬之句有文集十卷粹而贍通而不流類其爲人
內子嚴氏封彭城縣君子二祁郁祁字京叔少穎異爲學
能自刻厲有奇童目弱冠舉進士庭試失意即閉戶讀書
務窮遠大涵瀟鍛淬一放意於古文間出古賦雜說數篇
李屏山趙閑閑楊吏部雷御史王滹南諸公見之曰異才
也皆倒屣出迎交口騰譽之及與御史公退居於陳相與
講明六經直探聖賢心學推於躬行踐履自是振落英華
收其真實文章議論粹然一出於正士論咸謂得斯文命
脈之傳壬辰北還鄉里躬耕自給築室牖曰歸潛歲戊戌
詔試儒人先生就試魁西京選充山西東路攷試官後征
南行臺拈合公聞其名邀至相下待以賓友凡七年而沒
享年四十有八翰林承旨王磐誌其墓娶史氏洛陽名族

一女適前監察田芝子文冕一男景山終國史院編脩官
孫一興同有神川遜士集二十二卷處言四十三篇歸潛
志三卷行於世郁字文季亦名士中統元年肇建中省辟
左右司都事出尹新河召拜監察御史能文辭工書翰別
號歸愚卒年六十一娶趙氏前禮部尚書璜之女一子景
崑鄴字伯震一子景巒儼字稚昂鄰之祖也登承安二年
進士第累官至中奉大夫祕書少監壬辰北渡痛宗國云
亡蹈河而死配李氏封彭城郡夫人三子從禹字虞卿登
正大七年辭賦第官至朝散大夫同州錄判一子曰都從
愷字舜卿自幼卓犖不羣稍長入鄉校擅能賦聲再舉不
契就廕補官授武義將軍登封主簿已能綜覈縣務東涇
吏曹人不敢以少年書生易之國初生聚稍集遴選廉能

急於撫字辟府君攝領韶州事繼真授宜陽令縣當兵後
庶事草創下車廉知其利病休戚斟酌而更易之凡科取
差徭必驗其等第俾均輸焉暇則集俊秀於縣庠講明禮
義美善風俗爲政才期月而頌聲四達終更授河南府路
經歷素精吏事婉畫恢恢刃游餘地致六房無滯務公餘
與紫陽楊丈西菴楊公九山李子微薛庸齋微之觴咏於
泉石間中統四年正月二十八日以疾卒於私居之正寢
壽五十有五娶張氏宣德望族貞靖柔懿自在父母家已
稱純孝及歸于我事舅姑恭順飲食服御非經其手不進
也終於至元二十三年十月二十日享年七十有五葬合
祔子男三人廊字君美平江路人匠提舉至元三十一年
十一月以疾歿得年五十有五配段氏享年四十有九

袁部場管勾鄰才識警敏練達時務由省掾授承務郎工
部主事次陞承直郎順德路總管府判官選充監察御史
女二長適渾源州王氏次適應州元帥韓公之孫孫五紹
祖江浙省宣使慶祖澱山巡檢繼祖勝童乞童從稷字賢
卿終濟南路儒學教授三子曰郇曰柳曰郭侯承奉班祇
候遂州酒監一子從周字文卿劉氏先壠始葬順聖之耀
武關南山翁徙祖瑩於渾源縣東北黃嵬鄉御史君以世
故流離起先瑩於宛丘神川旅殯洹水歸愚定窆燕山令
鄰奉大父中奉公衣冠及考妣樞安厝於河南北邙之原
是爲渾源劉氏洛陽新阡鄰復欲彰先懿昭孝思圖不朽
諡不肖嘗問學於神川先生知其家世頗詳持張陳李趙
雷王諸公銘誌求述世德碑以猥列後進年迫衰謝不能

發越先賢事業且何敢秉筆於諸名勝之後堅辭者久之
鄰復曰金亡士之北渡者百不二三今消磨已盡求接見
先輩老於文辭而最知名者莫公若也今弗惠顧則先世
之事將何於託不獲已迺採掇諸公緒餘及已之聞見而
知者會歸其極而系之銘銘曰

漢庭射策貢士遺風排黜百氏仲舒是崇唐文三變敗北
無從振起衰繭尊昌黎公兩公傑出莫之比隆考其肩裔
孰繼芳蹤大名難再氣數奇窮金源立國網羅才雄首魁
多士惟南山翁程文妙絕一世師宗當時景仰韓董攸同
子孫克肖家學是攻魏科七決聲華摩空故家文獻泱泱
大灑蓬門卓爾世業克充言直行果節效匪躬支撐傾頽
致時之雍齋志雖沒留名則鴻中奉矯矯職貳大蓬存亡

惟義表我孤忠子孫昌熾爲報則豐神川力學洞聖心曾
明理貫道匪文奚工玉佩瓊琚大振辭鋒導家學之淵流
會百川而朝東章甫適越惜不時逢陰相同氣先志恢洪
朱衣白簡乘御史驄何劉氏之多賢試紬繹其始終種德
植善無踰於農立志務學祿在其中忠義仁恕傳嗣彌縫
維人事之克盡見天理之昭融宜澤流渾水之源青蔚南
山之峰北邙之原巋然新宮世故牽率匪忘祖封是惟金
百年文宗之裔過者敬恭

中州名賢文表卷第二十七

中州名賢文表卷第二十八

內集

姑蘇劉昌欽謨

王文定公

秋澗集

題跋

跋蔡中郎隸書後

科斗書當秦有天下未盡廢而程邈易篆作隸特用便牘
削耳逮中郎蔡邕去取丞相斯大小篆為八分實秦隸書
也近觀公建寧三年所書五官功曹掾夏承墓表真奇筆
也如夏金鑄鼎形模怪譎雖蛇神牛鬼厖雜百出而衣冠
禮樂已胚胎乎其中所謂氣凌百代筆陣堂堂者乎故書
家評公書骨氣洞達爽爽為有神宜矣昔張長史作書多
先觀古鐘鼎科斗文字遂楷法妙天下不然則無漢晉已

來高古氣骨不肖往年道出襄國讀宋文貞神道碑見其
筆畫一一涵篆隸古意乃知其言為有徵後之學者苟志
於古舍兩漢孰宗匠哉至元辛未中秋前二日同相人馬
才卿觀於省掾吳蔓慶之寓舍衛人王暉歛衽書

跋中興頌

歐陽公稱浯溪頌石歲久剝裂字多訛缺獨李西臺家藏
最為完好予後得而見之宦學四方來藏魯公書甚多茲
獨闕然及調官平陽會郃君和之出故家墨刻八軸蓋浯
溪臨本也命兒子孺臨摹雖精氣轉索庶幾典型具爾嘗
聞公平生書五百餘石其風骨氣韻率洞洞有神如忠臣
正色立朝羣姦魄褫又如元氣賦物流形都異因其人而
為變耳始秦越人探丸起死不主故常在邯鄲則為帶下

過洛陽則稱老人西入秦又以嬰兒醫名也故評茲帖者
謂閎偉發揚狀巨唐中興勲德之盛豈虛言哉閑閑公偶
以銀鈎鐵畫目之恐未盡善也至元十二年乙亥歲夏四
月六日臥病中書於謝帥第之北軒

跋郎官石柱記後

唐尚書右司員
外郎陳九言文

古人稱長史得草聖不傳之妙豈知真書在唐為一代精
絕所謂能行而後善走者也魯公書學氣侔造化真楷得
法多自公始郎官帖精絕為至舊刻在京兆今亡或云淪
瘞廳事址下近從曹生季衡得墨本全文蓋丞相壽國高
公故家物也老眼增明伏玩不置者累旬真希代寶也十
有三年春正月人日題於西山之讀易龕

跋手臨懷素自序帖

世傳懷素自敘帖有數本劉御史文季云昔吾從祖河平君所藏本最佳後有蘇才翁跋云前紙縻潰親為裝褱且為補書不自媿其糠粃也有杜祁公題云狂僧草聖繼張顛卷後兼題大曆年堪與儒門為至寶武功家世久相傳後又有山谷楷書釋文蔡無可家故物也北渡後觀金城韓侯及祕府所收俱無蘇杜二公題跋似亦非長沙真筆至元辛未秋九月晦余謁左轄姚公出示太保劉公家藏帖前三十三字亦云子美補亡披玩之餘令人仿像意韻盤礴於胃中者累月冬十月甲午是日極暄妍可愛乘筆墨調利喜為臨此拙惡非所慮庶幾見其典刑云耳監察御使汲郡王暉仲謀甫題識

題懷素草書千文後

予觀藏貞大曆二年海西寺所書千文極縱橫捩闔之狀其欲斷還連似斜復整筆增妍而不繁其減者意足而悉備如風檣陣馬驟不可當倒冠落珮狂莫得制至於氣凌過庭勢迫張顛雄偉豪邁超於法度之外者一一視之皆篆隸之古文耳茲本雖出臨摹精氣固衰骨脈具在所謂雖無老成人猶有典刑十一年正月五日風日清麗手柔筆利乘興學書覺胃中煩滯拂然從筆端出矣

跋張嘉貞書

近攷瘞鶴銘乃知為右軍龍爪書也予所藏唐中令張公嘉貞北嶽廟碑其意韻骨氣敦龐古怪如衝戈植劍特龍爪遺法為正書之一變耳張公當開元初拜大將提重兵臥護北門其氣固已雄一世矣及繼璟而相以強敏風操

聞然史臣稱公性疏簡與人交不疑內曠如也古人以書學爲心畫故其筆不得不雄放奇偉象乎爲人然未免夫捧心效顰也如優孟抵掌談話與叔敖俱化一一較之有不然者蓋其嚴辨有餘而高風絕塵爲少衰矣戊辰中元日書

跋麻姑壇記後

歐陽永叔云仙壇記有大小二本此大書者也其興寄縹緲穠纖妍麗無不可人正如覩麻姑手爪令人背痒時不待爬搔已渙然冰釋矣魯公書大抵與兩儀渾淪千態萬狀不可端倪因其人而爲變耳第記中皆懍愴不經之事公特爲書之豈王中令謝太傅文彩勲名凌誇百代未害登東山而有高世雲霞之志也

題魯公書臧氏碑後

魯公書三原臧氏二碑所謂紕宗者作擘窠大字體端整而頗瀟散如羽林壘壁橫天作陣勢相戛摩與衆星爭光而色正芒寒之氣爲有間耳其懷恪神道銛鋒勁畫望之凜然挺植戈戟一一較之不無利鈍惜乎出秀岩臨摹使千金駿足困伏皂櫪間其超逸絕塵之想索寞無光惜哉乃知太師忠義之氣發於筆端者諒非積學而後能也至元乙亥秋七月朔得此帖於參政李公

跋竹谿所題東坡墨戲後

竹谿書所見多矣未有若此帖之真楷蕭散者大似虞中舍諫獵奏狀間以側筆學坡之媚耳乃知公當大定明昌間不只以篆隸獨步於玉堂金馬矣輔之韞櫝愛玩亦醉

翁之意也可謂真知賞音者哉

跋孫過庭書

太宗以英偉之氣凌跨百代萬機之暇游心翰墨故二王法書盡入祕府摹倣臨搨然後以牙籤玉軸徧賜諸王何好尚如此其篤臣下得不從風而靡過庭適當其時今觀此書規模步驟一宗二王得飛鳥出林驚蛇入草之勢然點畫散落往往斷而弗連蓋體具二王而章草為羽翼也東坡謂陶詩初若緩散不收反復觀之乃得奇趣余於吳郡亦然但近代名公品題不到豈具眼者未暇及之邪子特表而出之至元辛未冬十一月二十四日與兒子孺重觀於京師咸寧里之寓舍時雪霽氣清率爾而作汲郡王惲謹題

跋荆公墨蹟

予嘗觀壽國高公所藏心畫水鏡知此為臨川所書無疑雖風骨遒勁而筆勢散落無繩削可據殆似公當軸時變新法調夸毗子青苗助役無所紀極噫一念之差至於筆墨間尚能髣髴其為人如此後之學者處心擇術當如何哉至元壬申重陽前四日書於平陽官舍

跋黃華墨蹟

予觀公書多矣曰黃華山主者蓋公中年筆也其格調步趨要本二王氣韻蕭散得元章之勝勁厲初不逮之然如王謝子弟以生長見聞猶足以超人羣也殷溪云

題黃華與李彥明太守一十三帖彥明係公同年友也

此數帖蓋公官翰林時書也至有饑寒之厄近在旦夕又云收拾扈從秋山貧家至甚不易令人披讀可勝嘆惋當明昌嚮文之世公以文彩風流照映一時其窘迫乃爾豈官散祿薄未爲道陵所知不然貧乃士之常事造物者庸玉汝於成邪至於文翰之妙如荆金和璞自有定價不待稱而後重也

跋任龍巖烏夜啼帖

南麓書在京師爲最多其擘窠大書往往體莊而神滯獨此帖豪放飛動超乎常度而木庵師謂醉後興逸妙能天成豈長沙率爾而顛字字圓轉之意邪然古人得意處非一如去乖就合意居筆先乘其調利例多高風絕塵不只藉步兵作氣而能奪三軍之帥也

跋任南麓所臨潛珍閣銘爲大陽津張提舉彥亨

賦總一百八字提刑王子勉目曰數珠帖

南麓書在金大定間號稱獨步然擘窠大書往往體莊而神滯今觀此帖筆勢超逸氣韻兼勝豈非抵掌談笑善學叔敖者邪

宣聖小影後跋語

金正隆六年太學生馬雲卿筆龔封衍聖公孔元措題識

宣聖肖像繪者非一憑聖儀四十九表擬之猶潢潦之於河漢培塿之於泰山也孔氏云家廟所藏衣燕居服顏子從行小影最爲真像此本蓋再一傳也嗚呼尊其道踐其迹是謂之恭敬不然天容日表雖參於前而倚諸衡是不幾於黷乎至元乙亥夏四月命士人王友仁臨寫小子憚百拜敬書

跋周處府君斬蛟圖後

役萬物而君之者莫靈於人而處尤以氣勝者也彼司馬
彤之虺鄙未若神蛟之變恠也老於菟之殘猛不減氏萬
年之嘯兕也處一旦視之猶尺蠖與孤豚耳乃知擁笈之
際其氣固已蓋西戎矣然有憾無援受制於人卒爲二豎
所害噫千載而下令人讀臨戎之篇凜凜然猶有生氣其
睨梁王不糞土若也雲史筆之諒有激而云

跋陶鎮生菜圖

蔬果猶犬馬然以其恆見而難爲工故生意彩色有郊圃
水濱之異鎮之筆不見收於御譜而爲金陵所題詠所謂
一杯密雲龍足以知名於當代也

跋范中立茂林秋晚圖

中立初年本學營丘極平遠炯秀之狀至於山骨鬱茂林
麓幽邃咫尺杳靄遠隔千里翦然若太陰雷雨不可端倪
茲蓋居終南晚年之筆也故當時有弃墨如泥之目是知
游藝雖宗匠前修唯其胸中自有一天乃能造微入妙

題王生臨道子橫吹等圖後

書與畫同一開紐唐賢善臨書宋人工點本要之極形似
而出神爽爲佳蒲江王生以讀書餘暇游藝丹青於臨放
爲尤能蓋致思詳雅不爲法度窘束筆與意會將天機所
到近爲予點道子馬融橫吹營丘寒江晚捕爲可見昔龍
眠作李北平射邊騎圖觀矢之所直迺應弦斃也若向作
著矢狀則風斯在下矣知此則能造微入妙文甫其沉潛
可也丙子清明日書於行館之敬止堂

跋秦得真墨軸後

墨之名家者唐已來不數人其難工也若是如坡公尚煤松自劑放潘谷漆法至竈發舍焚曾無倦色宜乎秦君嗜之而不厭也蓋將紹潘張之絕藝發潛德之幽光耶予近以沈煙寶劑就龍尾石試之其黑而能光清而不洩迺知精妙入神方駕前輩為諸公所稱道宜矣

祭霍山祠題名

至元九年冬朝廷以郡邑鎮山大浸載諸典秩者所司三載一祀霍岳在河東實為靈鎮故事每歲以仲夏土極之日用信報禮昭虔度也明年癸酉夏六月二十二日憚行縣北走霍邑前次洪洞雨不克邁越翼日抵趙城適嚴祀省牲之夕迺率霍州判官連漢臣監縣事塔的尹裴國用

王縣簿劉偉齋宿祠下將事之夕霧雨交作既祀之朝陰霾四開三獻禮成冷風肅然神峰鷲嶺軒豁呈露雖韓潮陽之禮衡岳孔廣州之祀南海不足以喻其快也陪祀者府兵曹解禎縣佐史高政稅監張承慶邑人薛昌齡嶽廟道士李志真興唐寺僧普光執事者吏王庭玉等一十五人遂相與饜飫神貺而退承直郎平陽路總管府判官汲郡王憚題記從行者閭山張思誠子翁孺

跋唐忠祚柘條白頭翁圖

忠祚前宋人宣和畫譜有傳

前人稱忠祚畫不唯極其形似如花美而艷竹野而天能狀物之性為好耳余尤愛其科條勁挺放筆而成得妙意於法度之外殆書家所謂錐畫沙也乃知畫與翰墨同一關紐豈虛言哉

跋楊息軒江灣漁樂圖

予初不解畫工拙非所知但開卷瀟灑見漁家風味令人
渺然有江湖塵外之思不知何時得帶笭簑以駕船獨贅
牙而揮車去作西溪漫叟為畫家所傳寫似亦不虛負此
生矣

跋藏春劉公東亭等帖

此太保劉公書也觀其筆法若不作意故飄逸如此絕似
長沙素苔磯靜釣等帖識者當以予言為不妄黃氏裝潢
者能愛之以為珍藏豈性與藝習而相近然邪

自題所書草字後

今日午睡起偶作草字數行因悟筆勢貴其神速要如李
愬夜半乘雪出其不意乃能懸瓠城縛取元濟爾

題丙博陽問牛圖後

蕭曹稱漢賢相然未免有牛飲池污之論豈狃於休息重
夫更化者乎及博陽秉鈞闊略細務每以燮和為心神爵
五鳳間蔚然有聲為中興名臣以二公較之佐命外吉寅
亮之功有足多者胡氏謂體元者人君之事調元者宰相
之職信哉彼闔里門而消沴因淖車而被謗者坐享堂封
無所事事曾不若丞相嘔茵吏耳予適纂述調元事鑑友
人敬之之子公讓請題其後故書

題王郎中國範所藏唐翰林供奉畫玄宗幸蜀圖

世知天寶之禍階於九齡罷相政歸楊李不知枉害忠良
一言玄宗已為聲色蠱惑其明理亂顛倒莫知所從逮夫
九縣騷馳越在草莽方思曲江忠諫遣使祭墓嗟何及矣

今觀是圖自馳出大內宮衛依然供頓咸陽父老進說次
馬嵬而六師不前痛九廟而太子北駕至犒遣扶風蹭蹬
蜀道彷彿躑躅怒焉如擣之懷去五百餘載按圖思事如
在目前令人動被髮伊上之感可謂畫中有史其垂戒深
矣

題坡軒先生詩卷後

予嘗於鹿庵讌席見老人數輩衣冠楚楚容止足觀當時
顯宦有不復及者詢之皆前朝權釀官也而況坡軒者乎
先生在大定間調監相酒其風流文采照映一世時賢與
之不在明昌詞人之下所存片言隻字猶當享之千金自
非篤好有睨而不顧者夢卿出將家喜詩學固能寶而藏
之異時醜酒臨江助吾橫槩之氣者不為無得於斯文也

題李懷遠事系後

李鎬字之京涿之定興人父金大定間進士第終蘭州刺
史先生姿冲澹樂山水初蘭州府君官鳳翔府近山多勝
槩公日登覽怡說至樂而忘歸自是畫品日進北渡后留
寓淇上僕猶及識之番番然一良士也嘗作樊樓風雨春
雲出谷二圖大為東瀛子蕭公所賞識曰士夫間不多見
也以門勞官至懷遠大將軍集慶軍節度副使壽六十五
卒於衛子師孟字希賢今年七十有五為人質直好義無
它腸精力強明飲啖不少衰時時尚能浮大白酣適簪花
曳杖游行閭里予每遇諸塗更忙與從容抵掌談平日心
事初不以憚獨而屑懷也然未免作句讀師自給其日料
焉復為一慨然耳戊子歲端月上元日秋澗老人書且得

載郡志寓居之列云

跋澹游先生詩後

黃華先生以海嶽精英之氣發而爲文章翰墨當明昌間照映一時惟其早世識者至今惜之余向客京師好事家屏圍幘軸無非澹游詩翰迺知老成雖遠典刑盡見於是此幅公之老筆尤瀟灑可愛豈神完守固氣自清明雖耄而不衰者邪戊子冬陽生后日秋澗惲謹題

題雲麾帖後

李北海書融液屈折紆餘妍溢一法禊飲序但放筆差增其豪豐體使益其媚如盧綯下朝風度閑雅縈轡回策儘有蘊藉三郎顧之不覺歎美東坡云予書初學李江夏后來自成一家及以雲麾帖一一較之坡第按之稍扁而青

出於藍耳蘭亭在古今爲真行之祖自太宗密尚一代學者爭師宗之然如徐季海輩尚未免誥體之俗況餘人乎公於斯時獨能高視遠步造微入妙臨池策勲固當爲右軍忠臣矣有具眼者出乃知余言爲不妄戊子冬孟秋澗老人王惲謹題

跋米南宮書曾夫人墓誌銘後

顏魯公稱殷成已雅善填書嚮見唐人作禊飲序每行特留二三白者使見其已者之功夫耳初觀是帖即疑其神爽索然之飛動縹緲之勢再視之乃知爲成已法也緣襄陽出奇無窮雖憑軾縱觀不無看朱成碧耽嗜者心慕手追豈不踐跡終不入於室邪夢卿來託審定所見如此於戲夢卿其寶之安知飛電流雲之駿不踵門而至者乎戊

子歲秋八月二十七日秋澗老人題

跋香林先生老饕賦後

真楷有常規而顛草無定態魯公傳長史之法東坡得魯公之妙至於率爾而顛餘未見能旭也今觀此帖馳騁長沙氣劇禱佛之壘耳嗚呼百年來人物淵源之盛槩可見矣先生姓田字信之前進士蒙城人學顏而至者也晚進王惲謹題

跋唐韋臯畫像

予嘗觀臯王畫像魁偉竒傑顏赫奕視猛而髯戟如老羆抗首有百獸不敢傷之氣不如是何以破吐蕃四十八萬之衆擒殺節度都督籠官千五百名乎至外臣自預政抗章勸進軍旅之目以定秦鏤號其豪侈橫恣在所不論及

歿有司欲追繩其咎賴門士陸暢者得解至今盛名有光於蜀嗚呼竹頭木屑其可忽也哉秋澗老人偶題

附錄

大元故翰林學士中奉大夫知制誥同修國史贈學士承旨資善大夫追封太原郡公謚文定王公

神道碑銘

并序

皇慶壬子歲朝廷推恩舊學贈先考中奉府君翰林學士承旨資善大夫追封太原郡公謚文定允妣推氏追封太原郡夫人眷恤隆渥上及二代明年春正月丙午焚黃祭告寵賁松檟越王氏有煒是用追述先公立身行道致茲顯揚者敢昭告於神道先公諱惲字仲謀世家於衛曾祖諱經隱居讀書鄉黨化其德謚文元先生曾祖妣呂氏臨

清大家祖父諱宇亡金衛州刑曹孔目官精於文法官敦武校尉用公貴贈集賢侍讀學士大中大夫追封太原郡侯謚敏懿祖妣孟氏韓氏竝追封太原郡夫人顯考諱天澤資剛明決科律學魁多士亡金忠顯校尉戶部主事中年折節讀書務教子起宗所交皆海內名士易名文通先生用公貴贈正奉大夫大司農卿追封太原郡公謚莊靖顯妣靳氏追封太原郡夫人先公幼有至性勤學好問若饑渴然弱冠受教於鹿菴王公詩文字畫已有聲紫陽遺山一見爲指授所業期以國士楊西菴曹南湖高吏部徒單顥軒愛其材器折行輩與交極口爲延譽中統建元左丞姚公宣慰東平辟充詳議官尋被中書特授翰林修撰同知制誥兼修國史院編修官制詞有行已無玷博學能

文顧超絕之逸才足鋪張於偉績之旨士論榮耀焉一時詔制辭命皆出其手共稱敏贍既而兼中書省左司都事建言曰廟堂出治之源今機務草創當究其本末先後酌而行之允焉遇事詳處得宜同列許其明達至元五年肇立御史臺首拜監察御史獻書曰憲臺執法糾正邪枉今無法可守取人無路宜講治制以立紀綱設科舉以取人材體用旣明朝廷不勞而肅矣憲察爲首前後申明典制彈劾姦邪凡一百五十餘章切直敢言不畏強禦於政體多所裨益如劾劉都水怙勢作姦陷公儲四十萬石權貴爲側目九年陞授承直郎平陽路總管府判官晉大府也先是吏風盛民囂於訟公用誠敬待官長威嚴肅吏屬作勸諭文一一則勉飭州縣革弊勤政一則諄告百姓務本

畏法致吏民感化奉約束惟謹歷二考如一日絳兵卒陳
姓者殺同產兄杜獄因鬻緩逮繫者三百餘人延滯至五
年之久遠近爲憤惋省檄鞫問廉得實跡一問卽服時晉
絳久旱是夕大雨霑足咸謂伸理冤抑所致各路設辦課
官例分門下平陽所轄院務幾百按籍點差終任不易藩
府採姑射山文石藉夫匠力闢山蹊爲坦途者六十里西
山伏利由之而出土人刻石紀其事大起府學敦勉師生
傳授暇率吏屬聽講風俗爲一丕變又復回車嶺孔子廟
首陽山二賢祠修建廨傳遞鋪以間計者千數增戶餘三
千敕使過晉者以政績上聞至蒙奉公勤政之諭十三年
奉命同陳節齋考試河南五路儒士語於陳曰吾道如綫
不宜用平時取法凡就試者皆以通文學第之十四年授

翰林待制奉訓大夫鹿菴大學方執文衡屢稱其文章精
妙明年秋選授朝列大夫河北河南道提刑按察副使改
除燕南秩競移山東東西道先公之任風憲嘗諭僚屬監
司職在繩愆糾繆肅清政務惟自治而後可以治人又憲
府非有錢穀詞訟之繁特明大體布公道事當覈議極乎
中正方可服衆惟克己自勵故按治州郡褰帷具瞻有風
動百城之目部內府尹恃占名鷹房恣爲不法公納賄賂
莫敢誰何卽按劾罪狀以聞蒙杖而黜焉憲臺徧諭諸道
遠近爲肅然冀州監從人因造作掎衆利甚夥與監逸去
事白曰行司巡歷動經歲時俟獲而治則姦人得計矣質
其田宅償其民南宮弭筆者號尹庫因告訐曾蒙賞賚沮
嚇官府肆凶侔利或言其擅殺耕牛歷數奸惡痛杖之而

死萬口稱快又辨釋德平民劉氏疑獄一十八年除行臺
治書侍御史不赴進承華事略於東宮廣孝立愛端本類
二十篇採古儲貳善事前有圖後斷以已意蒙裕皇徧覽
稱善賜酒有極用心纂述之諭令諸皇孫傳觀宮寮稱其
弘益良多聖上命近臣繪寫以賜東宮二十二年奏充中
書省左司郎中屢趣不應時小臣盧以理財用事或問其
故曰力小任重剝衆利已未見能久者可近乎既而果敗
衆服其識先而有守二十六年授少中大夫福建閩海道
提刑按察使甌閩僻在海隅歸附後官貪民殘奄爲盜區
黜尤貪惡者數十人乃上章彈劾行省官非其人宜選文
武備具有籌策大臣矯正枉濫肅清邊陲則民心服而寇
盜息巨賊鍾明亮嘯聚洪閩郊東擊則西逸西逐則東奔

彼此玩寇師老無功乃請立主師專號令朝廷允焉賊果
潰滅二十七年以疾得告北歸二十八年朝廷以耆宿來
徵明年二月謁見世祖皇帝於柳林行宮蒙慰諭久之繼
上萬言書條陳時政一曰議憲章以一政體二曰定制
度以抑奢僭三曰節浮費以豐財用四曰慎名爵以攬威權
五曰重廉司以勵庶官六曰議保舉以覈名實七曰設科
舉以收人材八曰試吏員以清政務九曰恤兵民以固邦
本十曰復常平以廣蓄積十一曰開屯田以息遠餉十二
曰息遠略以撫已有十三曰感和氣以銷水旱十四曰崇
教化以厚風俗十五曰減行院以一調遣十六曰絕交貢
以示曠度上嘉納焉授翰林學士嘉議大夫與議政事凡
預庭議知無不言成宗嗣位獻守成事鑑曰敬天法祖愛

民恤兵凡十五篇逐事直說本諸經旨侍臣謂純正親切有魏文貞司馬端明之風元貞改元加通議知制誥同修國史纂修世祖實錄作表進呈及封諡除拜大典冊皆經定撰大德元年進中奉明年戊戌春以三朝舊臣賜楮幣萬緡其年七十請老不許五年再上章懇請除公孺自祕著司刑鄉郡以便侍養仍官孫竒祕書郎榮其歸方優游鄉里樂遂安閒不幸於大德甲辰歲六月辛丑以疾薨於私第正寢之春露堂享年七十有八越九月己酉葬河西里之先塋夫人推氏祔焉送葬餘萬人及四方來弔祭者哭皆失聲曰五百年那復生此公耶先妣共城人尚醫推公季女資婉順事舅姑睦婣親以孝敬聞先公所得俸給均之家人惟恐失所若稍越規矩即治之如法故皆悅服

而不敢犯女侍生二子善加撫育無異已出內助力爲多先十八年卒生子公孺奉議大夫知潁州事孫三竒朝列大夫中書刑部郎官次詵詵侃侃尚幼女孫二長適昭文館大學士耶律伯強子著作郎楷次適甯氏子重孫五男漢璋德璋潤璋女二皆幼庶子二公儀廕授承務郎同知磁州事公說衛輝路儒學學正生子瑣住先公資明敏正大材器英邁操行純古博學有經濟器業與人交樂易直諒不能詭隨與時俯仰常曰士當行其所學明義達道一以至誠將之窮達得失有不在已者當官持重有體守正奉公表表欲見於世故所至有聲遇不平事及惡之可疾者憤然必窮治迺已官清要四十年自奉如寒士平生篤於禮義視勢利蔑如藩國世子且貴顯於朝招翰林諸公

燕集私覲禮衆議未一曰禮上國卿當下國君遂平揖而
已省椽趙和之病疽迎鑿救視沒為殯斂以行橐付其家
友人周曲山能官至廉卒無以葬營治至成禮南宮劉文
卿善數學客死於衛既周其喪妻少囊珍具甚富求一室
相依以禮謝去其廉正類此少與西溪香山友善時目曰
淇上三王別號秋澗晚節名德俱重為世尊仰不稱姓字
但曰秋澗公作為文章不蹈襲前人要自肺腑中流出平
居談話無異於人及操觚染翰經旨之義理史傳之鋪陳
子集之英華古今體制間見疊出雄深雅健辭古而意不
晦以自得有用為主宜乎綰持文柄獨步一時字畫適婉
以魯公為正所書卷帖為世珍玩樂教掖後進明義理工
文章必盡所得又善因材致篤故藉之多顯達者自少至

老未嘗一日不學易篲方停筆平昔著相鑑五十卷汲郡
志十五卷其承華事略守成事鑑中堂事記烏臺筆補玉
堂嘉話賦頌詔誥表啓書疏詩文碑誌銘贊樂府號秋澗
大全文集者一百卷延祐六年蒙朝廷公議為之刊播焉
富哉言乎其勤篤至矣其振耀後世宜矣至於論列時務
利害互明得失兼著忠愛情切聞一事可行一士可用必
為建白雖未盡行後竟如所言較其蘊奧見諸行事者纔
十之二三故贈諡制詞有觀其遺書蓋挹經綸之志詢夫
成蹟豈特黼黻之材惟治朝著蔡之是稽繫晚生山斗之
所仰蓋公論云敢用是為銘辭曰
士惟有立德功與言能一於此不朽者存顯允先公睠茲
克勤策勳學海力振斯文擴我浩氣塞乎乾坤手抉雲漢

大放辭源鴻文大冊帝載昭宣人所共知方駕昔賢紹韓
歐之宗派得文章之正傳匡時裨政人有未知志存經濟
惟日孜孜拜章奏記罔或少遺有物禁訶百纜幾施時耶
命耶而止於斯載瞻遺藁為世著龜山斗聞望後學仰規
內相美謚恤典恩推見諸行事功止一時著書傳後千古
是希孰得孰失必能辨之又何俟曠世相感則吾道為庶
幾用是昭告神寧無疑大行峻極清泉漣漪淵峙無窮永
照豐碑

嗣子公孺撰

文定公子公孺公儀皆能文公孺子竒亦以文顯而
竒後漸無聞昌至衛訪之不可得最後於史參政坐
聞參政舉玉堂嘉話數事顧謂昌曰此在王文定公

集中集板在嘉興可致也昌又徧訪之祥符儒官有
自嘉興來者乃始託購文定公集踰年而得則殘缺
過半矣又求山鐫野刻於衛浚之郊得文定公及公
孺公儀竒文為多嗚呼以文定公啓之繼以公孺公
儀與竒纔百五十年所以考見其美者乃藉於是
集而子孫墳墓漫不知其所在使又百年併是集亦
磨滅則王氏傳承之美且復有不可考者此昌文表
所以繼作也嗚呼以世以地豈獨為王氏哉劉昌在
西河舟中試筆

文定公為翰林學士時有文刻水簾洞中昌課士之
暇遂出衛西門尋青嵩山山在淇縣南四十里有水
簾洞然險僻不可入昌乘輿由金牛嶺折而西行深

澗中石磊磊擇地始得步乃舍輿躍騎陟石崖二里許至小風門人有攀蘿而上者望之危若懸猿不能不爲之目瞬心掉又折而西北十餘里始至大風門舍騎而登挾以兩隸而加之引行十里至所謂雲夢山今云北坡山望煙起叢薄間從者曰此道院也乃少憩有二三老攜茗飲來爲盡一盃又行里許見臺殿金碧朗麗若浮空而出者締視之則在大石上端巖宏偉所謂玉皇殿也而四面皆石壁萬仞深杳迂迴下緣山趾登大阪始及門如投阱中然既入則寬閒寂寞真神仙窟宅也南即青崑山今云南方山蓋以其形似言之耳洞在崖半中有井常出光怪水溢流沿洞而下若簾然故云水簾道院爲汲判井德常

建磨崖刻翰林學士王暉記上爲盤螭中可一丈許下硤爲左顧龜極工記文宏深典重真可垂傳而洞口刻三四詩極高者苔蘚蝕澁不可讀其下二詩皆贊井公者東入老君祠有洪武戊寅歲彭守約題時已卓午從者具蔬飯飯畢出望蒼峪及桃峪口欲尋醉仙迹不果夫山窮水僻處幽勝之境出於天造地設而井公獨能用志於此名因文傳而文與洞且將與天壤共弊不亦奇哉昌固有志焉而力不能及也漫詩以識之漠漠寒山隱隱鐘迢迢石磴接諸峰支筇欲下人如鳥攬轡先登馬似龍蒼峪雨添溪確急青崑雲護水簾重徘徊讀盡磨崖記却笑無能繼後蹤又題水簾洞云秋雲不捲水晶寒芝草年深溼未

乾翠壁懸冰鳴劍佩蛛絲穿露織琅玕夕陽照影鮫
綃薄春雨添流瀑布寬我欲尋真問丹訣憑誰傳簡
借青鸞成化己丑秋姑蘇劉昌在湯陰察院書

中州名賢文表卷第二十八

中州名賢文表卷第二十九

內集

姑蘇劉昌欽謨

字木魯文靖公

遺文

碑銘

真定路宣聖廟碑

初鎮州置真定路以中山冀晉趙深蠡府一州五土地人
民奉我睿宗仁聖景襄皇帝顯懿莊聖皇后湯沐首務立
學養士當是時也世祖聖德神功文武皇帝淵潛朝廷聞
鎮之學緩未即敘龍集丁未敕有司勿怠其事於是以金
粟岡廟址崇殿廡闢黌舍太原元好問有記越十有四年
庚申世皇即祚都燕統一八表置憲肅郡府鎮憲為諸道
之冠庠序闕略必憲人府人胥議興治至元暨今雖屢加

葺猶有未備至順辛未憲暨府議倡集楮幣三萬市物傭工募役自殿之廡自廡之門新其屋盈三十有二棟宇軒楯拱挾環合左右翔峙作杏壇於殿之北神廚於廟之東自廟徂學門垣榷桓循序森立瓦墁締築堅麗於舊先是府尹馬思忽已基未構而去政人遷易者十餘年尹張猛合倅和則平治中和允升繼至憲使妥歡提其綱賓佐韓復理其目始克有濟其年夏告成壬申春府遣吏李明善介徵士瞻思狀來請志其績紳嘗貳憲燕南義不容讓稽宋蔡京遷學陸佃記略曰真定雖塞北有江南之勝江南豪傑特起如臨川王公與孟軻相上下真定初未有聞噫是何言之怪也真定者冀州東垣堯舊封也昔帝堯以帝嚳子侯恆山之唐自唐侯即天子位徙山之西號陶唐氏

太行東西境數千里皆帝之圻真定固神明之宅也孔子經法於易則溯伏羲以本無言書則始唐虞以道政事詩則采殷周以正性情春秋則黜五霸以嚴名分禮樂升降以鑑窪窪天人之道至矣迺曰惟天為大惟堯則之唐韓愈謂堯以道傳舜禹湯文武周公孔子孟軻蓋孔氏立教如帝典微言如三謨帝堯孔子位不同而同聖王安石背道迷經蒙君誤國京佃傾黨滋熾世益大壞河南程氏兄弟承先聖之緒揀之終賴其言道不墜地建安朱氏師則兩程哀輯遺言貫通折衷以悟百世先正許文正公見其書神感明會相我世皇同符堯舜世道人心翕然大正洙泗淵源日月昭朗今神聖繼興世日趨治鎮股肱郡也帝堯之思在焉朝廷之化先焉崇事先聖所以教也鎮士知

所嚮往下學上達尊經慎藝何德不進何業不修何邪不
鑑何古不及憲牧之輔治教縉紳之報君父於是乎在迺
賦詩以慰鎮人士曰

太行之山滹池之水孰古與美陶唐之里滹池之澣太行
之所孰今與伍皇祖之土恆山嶙嶙滹水沄沄昊天生民
思堯之仁滹水湯湯恆山蒼蒼帝堯相望於赫世皇始鎮
之府時未忘武維士與女澤沐時雨龍德出潛萬方既瞻
春熙秋嚴自北而南皇風斯扇時雍於變視彼侯甸恆鎮
之先大殿周廡先聖之宇久未今覩誰敢予侮有廟有庭
有戶有扃肅肅其凝昭昭其靈新是鎮學式對恆嶽惟士
也確順我先覺求門於牆求室於堂伊洛考亭使我不盲
惟聖之玄惟王之素園冠方屨天地之度侃侃閭閻天天

申申如目之眴如躬之親既儼既翼臨汝明德以賓皇國
方州是則鎮人聚喜歸功憲紀憲人曰止其誰敢爾顯望
神京稽首奉揚配天無疆天子之光

平章政事致仕尚公神道碑

大德八年春三月己巳中書左丞尚公請老上不允若曰
其服朕命毋怠冬十月稱疾力請予告九年春還保定時
年六十有九明年夏六月拜昭文館大學士資德大夫中
書右丞商議中書省事召不起武宗即位加榮祿大夫預
司農司事中書職仍舊召秋九月覲龍虎臺大臣莫不譽
公上悅若曰衆以卿宣力我家爭譽其賢故耳公再拜稱
觴上萬歲壽御璣賜之酒故事酒答臣下璣人授之不親
賜也時特授公左右相目嗟異冬十有一月東宮賜宴翰

林俄以疾還至大二年春正月使召辭三年冬十月贈爵
三代仁皇出震召問大計稱旨賜宴清勝園皇太后賜宴
南園夏五月丐去陛辭上御武帳聞之以氣暄室隘敕近
臣出諭若曰卿來盡心獻納朕未始不從稱老懷歸豈遽
忘國家耶凡益國便民其以疏聞當行朕即行之敕宰相
李道復等進秩慰餞遂加銀青職仍舊賜白金百兩金綺
二匹宴中書驛送還歸時年七十有五延祐五年制贈曾
祖考仲資善大夫翰林學士上護軍追封上黨郡公妣魏
氏郡夫人祖考安榮祿大夫大司農柱國祁國公妣王氏
國夫人考汝楫銀青榮祿大夫大司徒上柱國祁國公妣
李妻魏皆國夫人六年春正月拜太子詹事使三往迺起
三月辛酉見上嘉禧殿之後閣上顧太保曲出目公曰是

自世祖皇帝効力潔淨人也徐曰周卿汝前汝知古今識
道理練大務太子託汝善輔之有言勿吝善教之此朕意
也公見皇太子首以念祖宗孝兩宮養德性辨邪正陳之
太子異其言夏五月北幸觀花園北行殿上若曰朕不文
直諭汝勿惜盡言教太子賜尚醞馬酒各一罌詹事俸入
不受俄謝歸時年八十有二泰定三年以中書平章政事
致事制授於其家賜楮泉萬緡綺帛四端尚酒二尊公表
謝復賜酒時年九十有一朝廷尊賢養老思輔長治其見
於公如此四年十月八日薨享年九十二訃聞制贈推誠
佐治寅亮功臣金紫光祿大夫大司徒上柱國追封齊國
公諡正獻公諱文字周卿祁州深澤人幼嗜學甫踰冠卓
邁有聞世皇御極急務求賢二三大臣體上意銳采擇中

中州文表卷第二
四
統元年張忠宣公文謙宣撫河東還故參知政事王椅薦
公忠宣奇之辟掌書記至元元年辟西夏行中書書表二
年始立朝儀詔魁賢鉅德者討論詳定太保劉文貞公秉
忠薦公參預凡常朝朔望起居元日冬至會覲再拜內外
文武仗衛布置服色差等圖象規製皆公掌之節次入奏
清問所及必公條對明白久之聖鑑通朗敕結綵畫位皇
城之東百官肄習上御法座臨之見大書宸極御座之居
上召公問之對天極居中衆星環共帝德無爲天下歸之
其象類此上悅習已大悅遂爲定制播告天下七年敕知
事大農八年轉大農都事禮成置侍儀司大保以公見上
仁智殿擢右直侍儀使十有二年復都事大農其佐農政
也置七道巡行勸農事聯保五課耕桑脩水利立社學築

義倉革浮薄禁游惰多自公畫十有七年出守輝州不事
刑撻因其土俗以禮導之令行禁止河朔大旱禱輒雨歲
大熟踰境旱自若也聞者異之懷孟馬氏宋氏被誣殺人
訟蔓不決提刑部使檄公讞之推跡究情得尉史獄卒鍊
嗾狀兩獄皆雪收輝二年民安事洽十九年冬召拜戶部
司金郎中初竹稅置提舉隸省部懷衛居民犯一筍一竹
率以私論至破家至是抗言罷之課入郡邑害遂弭明年
秋使山東定征稅度風土市廛立中制江西省憲交訟裕
皇令中書公奉教訊詰罷省臣宣慰臣各一追白金千二
百兩二十一年冬改戶部郎中明年春都事御史臺會聚
斂臣荅即歸阿散等謂海內財穀省院臺內外監守里魁
什長率有欺蠹請大蒐抉上允敕衆勿沮利黨嘯結兇壬

中州文苑卷第二十九
五
擬使旁午省臣御史掾吏民庶罹寘陷日衆人情危駭先
此南臺御史封章言帝春秋高宜禪位於皇太子皇后不
宜外預太子聞之懼公因祕之以杜讒隙此曹覘之鉗臺
史督索公白中書右丞相安童御史大夫月律魯拒之越
翌日其黨以聞敕太宗正薛尺玕取其章太子益懼二相
憂變不測公思用拯之方閱舊案得兇黨罪玷數十白大
夫曰事急矣請就省圖之至遂說曰丞相大夫以勲貴忠
賢荷天寵柱石廊廟皇太子天下本固本安天下兩公任
也此輩傾險乘釁奮不逞祕章出禍可言邪今先計奪謀
使噤不容喙策之上也二相曰善入言狀上怒若曰汝等
無罪耶震厲未止丞相前曰臣等有罪不辭但此黨名載
刑書類非慎潔動必驚害生靈宜選重臣使為之長庶靖

紛擾上徐霽威可其奏二相出宣制緩其行兇爛為沮俄
而告賊賂者喧集事聞天威大震或誅或竄或奴時漢人
臺臣皆闕公位幕佐以智勇忠義動大臣悟明主殲大憝
銷大釁旬日之間中外清泰聞者壯之俄丞大農治京北
屯田畎澮汎溢不蓄二十四年置尚書省柄臣顛政急賦
讒戮大臣衆股栗使者四出峻繩督務羸官緡徼賞悅公
使燕南得鈔緡約四十萬與民者三之二賞雖不及功亦
見時至元鈔始行置寶鈔提舉司隸都省金與銀禁私易
小人挾威張罟獲飽饕餮摧破民產動再年使江西治其
敝吏行詐舞文各以罪論或誣熊氏子買藏金尺吏訊則
無之訊益酷乞輸直不聽聚貸簪珥作新尺符其妄迺已
劉氏子誣其弟貨利潛易金銀獄久不絕事皆類此公至

中州文苑卷第二十九
六

率清脫民始寧息其年理鹽茗雜稅江右明年升少卿理
獄理賦山之東署置濫溢汰之政令苛虐蠲之事理欺惑
正之尚書省罷政歸中書遷吏部侍郎考覈尚書省臣鈐
綜所不當最簿上之流品清別井井不紊始以肅政廉訪
司憲諸道明年公使憲湖北初提刑按察之憲鄂也行省
奏罷其司聽攝山南者再事滯民疚公曰此憎忌者間之
耳凡政刑大務即省議之慶祝大禮赴省行之糾按貪墨
不少貸讒格政行民始受賜三十一年秋召爲刑部尚書
公以遠近稟決刑制不一吏誕民瘼請依古律令采寬厚
新憲章以一吏治不報成宗元貞元年春拜侍御史會江
浙省平章用虐行悖行臺御史浙西憲人條狀彈劾制遣
公泊大都護往詰之左驗明著平章者挾貴驚岸不臣公

等以聞平章者以國制軍數禁密無敢或預御史嘗取數
鎮兵於是藉其故擅驛走都以相噬咋都省奏不用臺臣
特以都護按問制可御史逼威即承兩造具備敕省臺太
師宣政等衆大臣雜議率阿勢貴犯輕宜宥御史法當死
公曰不然御史職號監察今所繫者上欺下暴制使馳訊
拒捍無禮罪重不輕必以軍數有禁言之小吏佐書掌給
鹽米甲簿伍籍數誰不知况御史因兵卒交愬責令長帥
均役情無害法縱有罪亦輕不重皇上御大寶赦天下德
洽民心豈宜濫刑以累聖治議都堂三辨巖廊再衆列奏
公廷爭剴切上開悟平章御史各杖遣衆呼萬歲他日集
肅政堂衆憂省臺不協公曰天下無難事第恐處之失其
要耳都省長百司丞相握大柄相抗不敵動瀆天聽取厭傷

體自今而後狼貪虎暴者抨彈之事不涉私者正救之果
大鉏鋤論斥未晚何用紛紛衆躋公言未久猜釋風紀肅
然二年請無數赦罷役不急上嘉納大德元年夏河決蒲
口冬公使憲河南明年春偕勅使相決河籌久利公建言
長河萬里湍猛東注下盟津地平土疏蕩徙不常失禹故
蹟流患中土不知幾何千年孰保無患治得其當則民省
而患遲失之則力費而患速此定論也今陳留抵東西百
有餘里南岸故河口十一已塞者二自涸者六通水者三
岸高水六七尺或四五尺岸北故堤水高北田三四尺或
高下等大較南高於北約八九尺堤安得不破水安得不
北也蒲口今決千有餘步迅快東行得河舊瀆行二百里
至歸德橫堤之下復會正流或彊湮遏上決下潰終竟無

成揆今之計河北郡縣順水之性遠築長堤以禦汎濫歸
德徐邳聽民避衝潰圖所安嬰患戶齒河南淤田量給永
業他決視此即救患之良策也蒲口不塞便策上廷論從
之河朔郡縣山東憲部爭言果然則河北桑田盡化魚鱉
之區矣塞之便復之明年蒲口復決障塞之役無歲無之
是後水北入巴河復故道竟如公言三年秋憲山東宣慰
使挾壻宗室以浮論懲叛謂治淄青政宜猛故藉是久居
方闡外掠譽而內貪虐憲糾小有違言吠啞即至公度難
力爭使者往來公以溫言順附而嚴礪之彼乃感服其下
稔惡會有告者選官按詰得二十餘人決杖追贓以慰憚
弱遂大慙謝遂所親暱用事十餘輩歸民田二百餘頃四
年秋授中奉大夫參知政事行省江西既莅政以吏選淆

濁凡庠序之師軍民之佐財穀之主典隨事立法負數百
浹日皆注無復容私衆始睚眦終莫奪俄趣公分鎮嶺南
快私憤公曰此軍政也非制敕不敢行驛使頡稟得報蒙
古平章偕公在省餘以次出鎮衆計沮事聽公決摧彊生
枯濯煩疏壅省悟清簡六年秋九月移疾北還冬十月拜
江南行御史臺中丞辭明年召至京師拜資善大夫中書
左丞時朱張氏得罪省臣率譴逐唯左丞相兩新平章洎
公凡四人調燮政務浙西水沴民饑山東歲兇盜充獄公
議發官廩周罄之縮湧價舒市易泄富足通閉遏責兼并
仁客佃民能施米上三百石爵有差得米石五十萬救吳
越餓殍爲蘇出官緡八百五十餘萬齊魯斂攘亦息選
清望臣使十道宣撫天下采失黜貪暴安善良江

南官民田賦均減三之

方學浮圖氏號白雲宗者髮

而妻子田宅誅愚

託祝釐逋徭賦倖習甘賄奏爲總攝

錫印章郡

豪名署七千餘所衆數十萬於是罷之斥

散黨與同民賦役時順德忠獻王荅刺罕與君同心輔政

選庶官齊百度罷斜封汰冗員絕寶貨約濫支節淫費量

入制出擇民牧屏世守定賊律除虐禁明婚制阜民生綱

正目舉有中統至元之風公粹美高亮行修潔年十六七

志學翹伊洛究洙泗完經大史諸子百家該洽無不綜一

以仁義爲根極孝友行業著見州閭大臣交薦聲名日振

世廟方大有爲衣冠元老森然以所能輔經緯公翱翔上

下畫佐開先實與有力歷事五朝才識弘經濟功名映寰

海德望尊廟堂忠信締淵穆懸車私第嗣聖繼明眷注益

渥使車累召進必勇退從容事外二十餘年壽考康彊几
杖清寂手不釋卷搢紳造之非聖賢中道經綸大經置不
談聞者隨其器量大小皆潤漑天下望之若瑞星神岳素
纘嚴絲飲食動靜皆有節制居位應務察事理守名法簡
易正大物無不容推行所宜不膠不固入政大節利不回
威不屈仁勇沛然綽有餘裕古遺愛遺直公盡兼之於戲
世皇長駕闊馭網羅英才培植之久大德卿相稱賢無右
公者養賢資世豈易言哉公娶某氏子男某某孫男某某
年月日葬完州某鄉某原公弟之子曹州判官克和以國
子助教張執中所狀公行遂以銘託烏乎公往矣文行事
功百世師也其敢以昧陋讓銘曰

皇元統天大定于一聖聖明明崇建皇極三光五岳氣象

渾同天產人瑞以弼帝功瞻彼恆山峩峩大茂挺生尚公
神峰綜秀始遇世皇邁績華勲禮樂稽古稼穡養民鴻臚
大農事係賢哲左右後先夷夔稷禹朱轡五馬衛源之許
里詠塗歌神明父母孰驚皇靈七鬯震搖用輔執法正色
立朝孰斲民力烈火凝霜用使四方雨澤春陽孰縱陸梁
摧我獬廌用立憲紀鋒稜益大孰徇貪蠹梏彼鴻鈞用握
政柄化育載新年鄰七袞勇於告老天制臣義豈曰太早
昔也廟朝淵淵晒晒軒后之鑑神禹之鼎今也鄉社于于
雍雍天下之表人中之龍有謁其庭鄙吝清滌齒頰餘論
皆世藥石道德之容禮樂之度大醉而醒孰寐斯悟善數
數之侯卿侯公百歲完潔其誰擬隆有德有文有位有壽
功在史牒名垂宇宙太行嶙嶙滹易云云刻此銘詩相配

無垠

大都路都總管姚公神道碑

公姓姚氏諱天福字君祥拜監察御史彈擊權臣無所顧畏世祖皇帝賜名巴而思國言虎也其係出唐賢相文獻公元崇文獻諸孫伯祿卒絳州觀察判官葬絳之稷山縣南陽里繇是世為平陽絳人公考處士君諱君實字仲華甫冠辟兵鴈門金進士趙泰以子妻之生公及和衆主簿天祿公姿白皙美風矩童州不凡聞處士訓忠孝奉受惟謹從事郡府挺潔不羣儕輩畏之仕懷仁為縣史世皇以太弟駐白登公從縣進蒲萄酒見奇之畱侍宿衛至元初丞縣懷仁大帥楊闊闊出薦其能於丞相塔察兒丞相奉使朔漠修睦宗藩引與之偕五年立御史臺丞相為大夫

奏授架閣管勾秩將仕郎十一年以承事郎拜御史十三年江南平冬十二月宰相銜怒左遷同知衡州路明年春三月以朝列大夫改河東山西道提刑按察副使佩金符夏六月拜治書侍御史秩中順十六年春使憲淮西江北道秩嘉議十八年憲江南湖北二十年夏憲遼東明年春以母老請歸養不允二十二年春召為刑部尚書秩通議逾年總管揚州不赴二十六年夏復憲淮西秩正議三十年拜中奉大夫甘肅等處行中書省參知政事以親辭改肅政廉訪司成宗即位使肅政廉訪於陝西元貞元年春三月遷真定總管冬丁太夫人憂自鴈門徙處士君柩合葬絳之稷山中書起公還真定大德三年春二月拜江西行中書參知政事辭奉使山東還四年秋七月以通奉大

夫參知政事行大都路都總管兼大興府尹本路諸軍奧魯總管管內勸農事六年春正月二十有八日薨於位年七十有三公至元名臣勲德焯著其薨也朝廷悼惜吏士護喪歸平陽以夏四月某日葬稷山西北嘉禾里泰定三年以子侃請制贈正奉大夫河南江北行中書參知政事護軍追封平陽郡公謚忠肅天曆己巳侃以公行實徵銘神道之碑不獲終辭因采其本末而次第之公始爲御史條奏宰相阿舍馬罪二十有四召廷辯公枚數其罪彼輒引服數至於三氣沮情駭上動色若曰此三者罪已不宥目公曰巴而思臣下有違太祖之制干朕之紀者汝抨擊勿隱廷臣震竦其事今祕世未有聞時方倚相理財姑釋不問衆亦爲公危之太夫人趙君有賢識勗公曰國爾忘

家汝第盡力果不測吾追蹤陵母死日猶生年公泣謝白其長曰萬一得譴乞不以老母坐連也語聞上歎曰是母子有古義烈敕侍臣董文忠宣付史臣書之監大名小敢普得罪御史按之至見歐辱繼用公往間道微服入境察悉其情還取驛抵其所摘抉如神簿責死罪十有七械送輦下俄以宥貫經臺門大詬公在察院促捕之日檢行橐得賂侍御史安兀失納救免狀即桎敢普而祕其事夜用巡符託詞邏奄至一道士室盡獲其賂明日陞奏上曰彼七死猶赦汝欲何爲公對罪十有七赦七留十餘誰任咎上悟戮敢普斥安時御史大夫二安善其一旣斥與所善猶雙陸禁中公曰安庶人耳豈得與大臣狎叱令起座皆失色公即入奏一蛇九尾首動尾隨兩其首行不能寸今

憲不網蛇首二也上曰然一人二冠可乎召兩大夫諭以
公言大夫孛羅懼以年少自劾罷有讒提刑按察之不便
者有旨罷之是時廣平貞憲王月呂魯爲御史大夫公告
之曰往者悖叛蝟起鄣塞見聞今列憲宇內廣視聽虞非
常慮至深遠不但繩督有司而已也縷縷陳之大夫悟矍
然曰幾失是夜造禁密詳奏上曰此天下安危計也其勿
罷會駕北幸所擊相馳騎士縛公閱其家脫粟數斛外得
言事故藁羅織苛毒公亢聲曰乘輿行狩戕害言官宰相
寧欲反邪拮拾無所得斥遷衡州俄憲河東太原民飢開
廩賑卹議者以擅罪公上知不私置勿問朔方兵興役民
轉粟人畜顛踣公曰執政非策自蹙其本也投闕論奏改
和糴疲瘵爲蘇留遷治書出憲淮西先是蘄黃有叛者將

吏臧獲良民以萬數公皆理歸民伍衆感泣相率立生祠
徙節湖北劾省臣楚國公罪以聞上閱其有勞爲痛治其
黨會阿合馬敗大遣使治官慝遼東宣慰使阿老瓦丁權
黨也侵暴尤橫召公使遼至則封府庫究簿書審事察寃
正魁惡著公道使還即命長憲遼東公疾馳夜入詰旦莅
事民懽吏愕郡縣竦動初遼朔旱蝗公至雨澍蝗滅其境
域烏桓白霽故地也民喜畜牧習射獵不事耕學公教以
稼穡詩書居數年農墾士奮民之孝者旌之不義而訟積
年不決者訓睦之稔惡者懲艾之武平縣民劉義訟其嫂
與其所私同殺其兄成縣尹丁欽以成尸無傷憂懣不食
其妻韓問之欽告其故韓曰恐頂顛有丁塗其跡耳視之
果然獄定上讞公召欽諦詢之欽因矜其妻之能公曰若

妻處子邪曰再醮令有司開其夫棺毒與成類并正其辜
欽悻卒臺章以公詣平灤按總管劉捏古伯公至劉欲遁
去公密令憲廉張仲威作漁人匿西城橋伺之劉果與吏
徒會橋下謀擒其愆仲威得真公一問皆伏吏胥之黠而
虐扼民之吮而快其所欲而民莫敢校者率以罪黜平灤
都吏張氏子尤狡而伎杖去之遠近震警道行遵化風旋
馬前公默謂之曰汝冤從我吾為汝理至縣舍風即見令
縣以橐韃士從憲廉覘之信宿及翁會而風息得五尸皆
短衣其一衣中得小印公下令居賈行商以端匹赴縣聽
和市辨之賊果執遼粟歲輸灤陽使督運急時民方饑公
曰吾忍視邪留粟賑糶使不敢沮民賴以生遼人以公政
通神明追思惠化立祠頌德入長刑曹讞獄與衆不合歸

臥於家竟如公言衆得罪公望益隆淮西不治復握使節
申飭舊規風采立變初宣饒徽數州有亂者官軍併俘齊
民加以劫掠絡繹淮境公責守令嚴津防峻訶譴民復其
鄉者數千餘家帥臣昂吉而閩淮殆二十年位中書右丞
以宣慰使操制兵民黨結中奧其子亦握兵煽虐奴官屬
轢風紀莫敢誰何宿盜數十出沒淮海陸梁自宋未有制
者宋亡帥葆芘其徒通納賄賂縱其所為公遣健士襲捕
得所匿兵仗貲財定案市殉者七人自是帥漁鷲狀百出
公疏其跡取驛上聞帥鉅驛勿給公潛前走得驛馳去帥
遣兵校丁文虎追刺公至六河館不及公至揚州文虎亦
至誣公於行臺俄而六河館人以刺公狀聞文虎被執公
赴覲制遣近侍阿朮治書侍御史萬僧馳訊帥以罪廢已

而赴闕以擅殺淮賊譖公不中憤而斃淮境大寧丞相桑
葛之黨虐平陽者尤劇其敗也用公尹其府以清宿蠹詢
父老得郡邑田里真偽利病緩急先後審行之民輯事理
至府吏欲案究公曰亂常之跡可侈言邪立命撲死衆股
粟政

驛傳雜事

痿大臣蠟真奉牧

遂尹真定道壅

枯壯弱日聽愬

堅動

無泥閔人人竝

衆走府治瞻判決優

初饋餼不

充徵需日困公以楮鏹貸民因母取

畜孳豐廩稍闢

大賓館水磴創立如平陽用有

宗親之位謙從之區

秩秩井井甲諸路歲省官

而下不加擾憲人撫細故劾

公中書敷奏事不涉私法可施用宜著令式以示他州制
可郡人集衆象龍祝雨公曰無益令撤去迺慮獄囚底平
允雨大霈驛置新樂北阻派水使价車騎自南而北者雨
溢夜暝野次無所建議徙置派南衆大便順築寺五臺督
民運木奪農壞衆令方急公不從府懼佐貳交諍之公曰
吾民牧也惟民是卹請待農隙朝省爲允樂城盜殺人取
財夜昇尸置民隆氏邸縣笞伏隆氏父及二子當死械囚
送府哭於庭尸母辨賊無其子印識公疑之會使者決大
辟公詒他賊承盜殺狀隆氏獄緩真盜遂獲黜吏退胥之
在民間者不啻百數劫持官府而肥其家弗其心則禍之
管庫稅廩之徒往往破產質妻鬻子以償所欲而不敢與
辯公劾農諸縣得其姓名杖死數人質鬻者還之餘多遁

去或改行爲善士其尹京也立誠信繩桀鷲挫強禦卹憊
弱事至而斷豪右斂迹三河民藏古銅印怨家訟曰將謀
作亂縣撈掠其囚使符所訟至府辨其文曰三河縣印公
曰何亂之爲以不輸官罪之制令尚廐芻稈以鹽易諸畿
民霖溢害稼公請市芻郡戶部據令督貢上下洵懼公帥
京屬從部白省竟以公謀寧息京甸京人弟假姊財不券
姊嫠益貧弟賈益富姊嫠徵財弟曰有券即與姊憤懇聽
者難之懇於公諭之曰汝但歸俟徐誅劫盜扳弟對詰大
懼吐實暨姊中分其貲公果毅直諒立朝敢言操行清介
忠孚信格有賜輒辭上至引唐太宗賞魏徵故事曉之對
曰臣言分也受賞非分也竟不受持憲總郡皆有聲績以
治盜赴鄂民衆衛送不絕盜聞之戒其徒曰姚公正人也

勿犯性孝太君年踰大耋公拜參知政事甘肅難於輦養
辭不往世高其行縉紳推論聖朝人物骨鯁有爲終始不
貳其操者公當第一固確論也蓋嘗稽之鴻惟世皇神鑑
睿算長駕遠馭文武效能光輔丕業甸萬國冠百王盛矣
然廊廟岳牧邪慝間出堯

當至元之際奮下列搏權奸莅

方州滌巨蠹使辯捷不能措其喙仇憤無所憑其兇風槩
氣節炳耀一世淵衷之所孚公論之所與豈徒然哉其忠
義剛大蘊積有素故也公揚歷四十餘年功名事業磊礫
赫奕侃訪輯遺軼旣久始備因歎世有家者之子與孫或
不侃若先烈湮滅可勝惜哉敘而銘之或有待也公始娶
趙氏繼楊氏皆平陽郡夫人子男三人壽童蚤卒祖舜祕

書著作郎卒侃內藏庫副使楊夫人子也銘曰
帝運開大中統至元人傑斯寶匪寶璵璠惟天聰明憲象
執法元化宣朗昭融六合堂堂忠肅始我鷹冠謹言正色
英風夏寒虎炳其文山立殿陛禱杌饕餮魄褫魂悸宸宸
凝邃上動天容庭有直臣庶儆其同有鑒其明有玉其潔
桓桓其勇夫夫其決孰撓斯由孰鍊斯柔善善豈親惡惡
豈仇雖千萬人莫沮吾往如脂如韋有泚其顙侯符三剖
憲節六持義槩秋凜仁術春熙上亮其忠史載其信何勸
不懷何懲不震碣石之北淮海之南社稷尸祝無怠其嚴
滄沱溶溶霍岳峩峩其融其結百世不廟台鼎之崇芥視
不屑京尹之雄莫仲與伯有烈終始無間險夷誰近而忽
益遠益思汾川西流河水東會稷山之銘惟以永配

參知政事王公神道碑

至大元年汴梁路總管兼府尹王公年逾七十拜參知政
事行尚書省雲南秩中奉大夫仁宗皇帝以公至元大德
名臣拜昭文館大學士皆不果行延祐元年冬十二月七
日薨汴私第春秋七十有九明年春三月十二日歸葬趙
州寧晉之金符鄉換馬里中書以臺疏列公行績以聞贈
通奉大夫河南江北等處行中書省參知政事護軍追封
太原郡公謚憲穆元統元年冬其仲子承務郎萬億賦源
庫提舉鈞以翰林待制蘇君天爵狀徵銘公碑泐汴諸生
也其敢辭公諱忱字允中世居寧晉曾大考進晦彩不耀
大考守忠金承信校尉考玉太祖皇帝威行中夏率郡民
款附從太師國王木華黎用武有功累官定遠大將軍慶

源軍節度副使夫人王氏生公剛毅正直讀經史不事空
言能見之行事裕皇位儲宮取勲舊子孫入侍公被選忠
恪小心十有餘年日慎一日或因事進說明諒不阿世祖
皇帝察其能至元十七年拜山北遼東道提刑按察副使
秩朝列大夫東藩諸王鷹人縱暴民大厭苦公繩以法遂
斂避不敢犯宰相阿黑馬培克固寵希合之徒言利徼倖
小吏耿熙告北京宣慰臣逋官緡若干萬既聞勅徵之熙
懼失實增益制敕逮繫百餘人公疏其妄熙獲罪裕皇賓
天儲極虛位帝春秋高中外危之言者雖衆未見允可公
建言陛下臨御多歷年所至元初預建太子天下歸心鶴
馭上賓臣民憂懼惟早定大計以幸宗社章三上帝俞其
言俄勅皇孫佩信寶撫軍朔幕大業廼定二十四年憲河

南時南北既一無俚兇慝略民子女轉賣四方公謂此徒
於聖天子仁覆天下之政梗害非常建請嚴立法禁從之
遂著令甲息民汪清占息民籍已再世矣兵豪狀愬帥府
曰吾亡奴也即馳騎數十殺清滅口取其妻孥貲產清子
成逸出赴民有司愬之兵民文移往來數年不決潁兵朱
喜始以避亂奴於人其主知其難於奴也集鄉胥里長同
署券免之隸潁兵籍已久喜家火其故主子謂券已焚而
復奴之喜持券出愬訟不決皆詣公愬之稽清占籍以歲
壬寅其奴亡以甲辰喜券足徵白之鎮南王府誣者皆屈
明年兩訟之仇結近侍誣奏公徇制下中書遣使收公案
訊公疏臺請聞有旨馳召入見敷陳盡底蘊帝大悅曰若
人非素餐者敕省臺讜慰還職近侍及使者皆以賕敗清

喜數百口脫虎啣繪公像事之二十七年置肅政廉訪司以新憲度明年公副使燕南河間鹽漕官守盜用賦緡十餘萬覈正其辜諸王分地恩州其下以錢貸民加倍徵息公令子母相當則止餘有罪先是以民入兵限私田四頃優其家公曰國家取天下以來兵無寧歲今海內雖定征戎遠方一兵歲費不啻千緡區區限畝豈易充給在民編者守令猶歲差富貧以均其力一入戎行永不可變請增田額使無饑寒內顧之憂不報其後以兵力乏竭敕樞密召公等會議以真定順德廣平等路俾之詢簡得富民數百家充兵兵之貧者遣還民伍人服其平公以舊臣屢憲方州至是威名益振三十年拜廣西肅政廉訪使秩嘉議臺檄以其廉能曉諸道疾不赴成宗皇帝即位元貞二年

春使憲河東召見柳林撫慰優渥會并汾旱饑請發粟賑哺全活者衆五臺大建佛廬敕中書擇銳事吏董役工部司程陸信驅民夫數千冒險伐木死虎豹蛇虺者百有餘人其時皇太后幸其所公入言以寺福民福未及而害已甚非初意也微聽開悟減其役仍賜卹死者家宗王分土并門廩餼歲取民間或不能供輒立契約毋息倍稱或不償隸其子女民患苦之公請出錢縣官贖還其親者百二十四人於是諸王膳貲歲頒於官民瘼始蘇王嬖臣哈增不花怙威肆虐公按正款伏王爲之請弗聽王馳使譖公上未信會駕北幸罪人亡走愬公不法敕中丞崔彧問之俄彧卒駕還復愬詔省憲雜訊之無驗愬者抵罪由是王禁戢藩僉民境晏寧大德三年遷江陵路總管不行七

年遷汴梁汴故宋金都邑號難治公至省人憲人以公舊望不敢以府屬眎之政訟之難悉聽鑑裁下無隱情久之政清訟簡吏民歌詠方宋包拯公莅汴之四年歲次丁未河決原武注汴宋汴尤急吏士具舟楫以道漂溺民大懼公白省請疏導順下勢家以田疇不利難之公曰吾守臣也當任其責即行河決壅以完城邑水息大築隄防羌族礮手居鄆陵者萬餘室民役不預公督使趣工得萬人不日隄成民至今思之公精明有斷不畏強禦所至興學獎士脩政新民不專法令威愛兼行爲世名德故姚文公燧劉文靜公因與公游雅相敬尚蘇君公鄉人也時賢言行優於志載其言曰世皇天縱有爲公及陳公天祥程公思廉姚公天福皆骨鯁敢言視社稷民物利害若疾痛嗜欲

在己才猷風采凜震一世庸夫庸婦知其姓字豈聲音笑貌爲哉天故生之以弼治效善論也公夫人張氏封太原郡夫人子男二人曰銳曰鈞孫男三人洙浩以胄子隸業成均淵幼銳鈞皆有學行翀固知之其諸孫爲胄子皆馴謹向學佳子弟也助教陳旅云銘曰

世廟帝運鴻惟永年仁浹義洽德崇配天咨謂裕皇左右前後侍衛僕從詢賢世胄時也憲穆宿衛青宮行必循矩言必見忠涵育有年一靜一動帝曰良哉才可試用卿貳東臬位四品秩碣石醫問光昭化日來歸定省遂莅河南上觸廷怒下驚狼貪帝曰忠哉斯豈尸位丞相御史燕勞還轡皇鑑昭明飭新憲綱卿才而舊益礪于將太行西東鴻河南北草木知名山川正色棲遲晚暮尹汴四封宋陳

許鄭春陽誕充偏側將迎於此大府齒健而獐猶憚巨處
上獲下順居五閱年華髮蕭蕭益壯益堅其卷其舒大義
終始鋼百其鍊肯柔繞指五握憲節郡符再分洪波砥柱
屹立不群政預鈞輔逝矣其道文崇祕館允也其耄之顯
高朗之幽神明之地列岳之天列星滹沱之郊邯鄲之鄙
刻銘豐碑徵信惇史

大元奉元明道宮修建碑銘

并序

老子生殷亳社苦縣厲鄉曲仁里距縣東不半舍九龍井
在焉崇事宮廟歷代相因憲宗皇帝四年龍集甲寅故太
師汝南忠武張王闡毫得太清明道兩宮遺址兵燹悉為
荒墟以文之燕請事修復長春嗣教真常大真人李宗師
遣隱真大師提點石志玉通微大師知宮李志祕綜其務

歲丙辰誠明真人張宗師奏請崇道真人張尊師棲雲真
人王尊師主其宮制無幾何棲雲蛻化其門人輩亦皆協
力崇道則始終不懈未踰一紀締構宏麗允惟明道故宮
以河渦混匯圯溺迨乎石李二公相繼為真人結廬墾田
充益歲廩事修治疏河流入北門繇是窪下澱而窪漫漶
涸而燥至元壬辰棲神真人陳志微以陳道潤張道淵楊
道和等率眾除荒實塹陶甃峙材準基定位以陳志和李
道堅等協襄事功達之長春玄逸真人張宗師用道潤提
舉宮事大德己亥棟宇克完百度鮮整棲真真人李志本
薦道潤志和道堅等陞提點今疑元真人馬道逸飭舊圖
新日益充大謂宜立石饒銘示永久元統元年特進神仙
掌教凝和大真人苗宗師召太清提點趙道真來京道潤

志和等因馬介趙屬筆於翀昔也馬真人乘傳北迴嘗識
於衛趙君用是惓惓遂不終讓序曰隋名苦縣曰仙源唐
曰真源宮曰紫極追上老子玄元皇帝以本帝系築宮縣
隅東北備嗣皇帝駕次之齊居榜曰奉元天寶二載易紫
極為太清宋加太上老君混元上德皇帝名縣衛真真宗
兩謁太清壇奉元之陰東鄉祀拜易宮額曰明道金仍其
制錫良田豐祝事鴻惟太祖聖武皇帝奉天威君六合天
寤宸聰使車馳召長春丘仙翁崑崙之山歷數年踰萬里
覲遐朔推道餘沃淵衷拯生靈仁萬有其功大矣老子毫
宮之方葺也世祖皇帝潛藩下教令即位錫以寶書申護
禁勗匠役遣使致祭太清畢工敕翰林承旨學士臣鶚製
其銘中書左丞臣樞書其文中書右丞相臣安童樹其碑

寵嘉之數滋隆往昔今道家殊流皆宗老子太清明道源
本所在長春道葉主嗣亭教知所宗矣翀惟大元慶運開
兆李唐奉元得名玄天陰隲今宜兼用唐宋舊額榜曰奉
元明道以尊皇極孰謂不可趙聞之曰唯唯迺銘曰

老聃之生於殷之亳微妙有無天地橐籥非隱非見仕周
藏史龍乘風雲帝先誰子繩繩道裔上
是弘儼像殿室
堂陞峻嶒
無間遐遠惟茲

毫土九
神湫孰源其泉孰
振百及今縣數千載

際我皇明華有餘彩昔我
雷厲八紘崑崙赴石軒轅

廣成坐進玄言天
宇宙在手天慈救衛有赫世皇

光繩祖武乾德
萬物斯覩溥浹寰海如天之仁知風

之自道系
中統至元運開鳳紀因亳仙源厲鄉仁里

嶽竦雲宮復太清濬鑑昭錫詞臣著銘趾邑良方宮曰
明道傾圮沮澤久未締造嗟哉岸谷變易高深逢我盛
抗起湮沈張肩王隨石孟李仲班班偉人繼拯立統至道
坦坦至衆林林才用其力德厭其心棲神棲真踵武徐起
習馭輕轅通轍順軌載定其址載莪其宮煙霞洞府風雨
幙幙山川會靈紫氣充盎羽泉式瞻淵宗有象邀食於地
邀樂於天果蒞在圃稼穡在田聖祖神孫開此道域其寧
不思荷帝之力瞻彼蒼昊有開必先奉元明道名豈徒然
太清在東長春在北祈我皇祚永配無極元統三年歲次
乙亥十月日中奉大夫江浙等處行中書省參知政事字
木魯翀撰

中州名賢文表卷第二十九

中州名賢文表卷第三十

內集

姑蘇劉昌欽謨

李木魯文靖公

遺文

碑銘

皇元故武略將軍濟南冠州萬戶府千夫長監末

赤公神道碑銘

并序

聖朝統有天下制官以國人冠其上如古置監者然重國
體也兵名所部曰翼其監以北庭有武功者爲之濟南冠
州新軍萬戶府千夫長劉洎翼監將武略將軍末赤以至
大三年秋八月十有九日終南陽郊邑私第之正寢享年
七十有八於是公告老去軍蓋十有五年矣既葬之明年
其子蒙幹特暨其孫耐滿特狀公平生走汴階其姍家子

劉生汝止乞銘且言公之子孫再世能讓蓋以公武足致位德足化家故也於是敘而銘之公世出朔漠其族世曰耐滿氏考曰昔不察當天兵南墟金社卒行間公寄跡在軍都帥府即署公劄臘都鎮撫屬副彈壓大兵伐宋從大將覘徹戰百丈山從萬夫長冶粟察破黃先洞至元十有一年從都帥鄭國忠宣公破沙洋攻新城明年冬從大軍擣江淝破關隘帥府以先後功狀彰聞分兵二百署職總把自是宋平十四年春正月戡定閩中有功行中書省版以舊職仍移書樞密奏授忠顯校尉職爲真其年從忠宣公定嶺海薦陞職樞密奏加昭信校尉職仍舊帥府署公鎮撫仍將其兵十八年十九年帥府及行中書薦以檄遣公領大將別部幹略戰效益有聞二十有一年詔諸戰將

定功以聞用是樞密奏遷武略將軍佩金符監長干夫時二十四年夏六月也其年從行省討交趾署副都鎮撫號召指縱勇赴銳戰抵蠻都襲逋王嚴柵護集矢石兵無違律省臣材之二十有五年歸駐鄂省以其功聞由是遷監濟南冠州翼鎮戍湖南之桂陽元貞二年公以老疾告其子和尚以承信校尉佩符繼職公姿雄拔性勁直事萃於下情捍於上以理申白無少阿徇佚老鄉邑優游以終嗚呼北庭將校之良也夫人笏都德明里祭大悲奴皆前卒今夫人蘇氏子男五曰寨臘曰馬僧夫人笏都德出也曰和尚母夫人明里察義男曰蒙幹特曰丑驢女三曰孛魯歡適百夫長吐臘曰完撫適冶先不華曰拜葉真適百夫長錫臘男孫十曰耐滿特曰明安達曰拓因曰掇烈孛特

曰關奴曰完撫都曰孛羅曰藹葉尺曰寶童曰壽童女孫
十有一先是公請老子寨臘當繼與其弟馬僧讓其季和
尚和尚卒子幼寨臘子耐滿特當襲又讓其弟明安達時
公生存子孫交讓於當年鄉人義之銘曰

元氣磅礴八荒同樞孰裂據之朝南一拘神人膺圖龍見
漠北聖聖迭作何判不一當至元初有事南方衆智羣力
雷砰電翔噓風喻雲霧廓煙闢運臂伸指無功不集相時
行間繫武略公雖職裨校克壯其戎歸老於家誨子教孫
以禮以讓雍雍其敦稽公之生自始奮跡旣昌其家又永
其福悠悠汝波紫雲東峩碑墓其阿百世不磨南陽孛術
魯翀誤

河南淮北蒙古軍都萬戶府增修公解碑銘

昔光祿大夫江西行省平章政事贈金紫光祿大夫大司
徒上柱國鄭國忠宣公推忠開武協運佐治功臣奧魯赤
統蒙古軍四萬戶佐帝平宋開闢洛陽縣龍門山之南伊
水之東以治軍政至其子嗣都萬戶脫完不花始構治宇
以肅官寮今其孫嗣都萬戶察罕鐵穆爾偕其副都萬戶
昔置伯吉謀曰舊治陋隘弊腐宜撤新之始其地廣袤十
畝因增倍於先治事之廳退息之室賓佐之幃幪廉使之
庥庇簿書之度閭財物之庫庾庖廚門闥譙樓隸舍至四
十楹壯麗崇深名其堂前曰仁武後曰忠益樓曰嚴更遣
千戶咬住暨忽都帖木兒馳狀徵記劄臘爾氏自行省鐵
木台麥烈忠宣公奧魯赤銀青榮祿大夫上柱國湖廣等
處行中書省左丞相脫完不花贈守忠翊正濟美寅德功

臣資德大夫河南江北等處行中書省右丞同知行樞密院事普答剌吉贈保忠經武致德宣忠功臣上護軍夷山郡公五世六襲及今都萬戶自懷遠大將軍加昭勇年三十有二旭申氏自博魯溫諾延行省兵馬都元帥塔察而蒙古軍四萬戶別里即台橫州屯田萬戶府達魯花赤輕車都尉平陽郡侯密察而都元帥兼江東西大都督宋都台鎮國上將軍江西道都元帥阿魯輝輔國上將軍江西道都元帥副都萬戶平陽郡襄懋公伯里閻不花六世八襲及今副都萬戶自懷遠大將軍歷定遠加昭毅年三十有九昭勇昭毅皆蒙古貴族世胄其祖與宗自太祖聖武皇帝來繼忠勇靖朔漠開西域伐金伐宋一海寓著勞績今兩都萬戶協心力輯軍衆居則恪官守動則整戎行善

於紀律斯可見矣乃序其事銘其堂所之碑曰

皇元受命震起天北風雲龍虎感會奮激羽翼爪牙交濟其功分守方嶽帥總元戎河淮都侯峙閫嵩洛兩帥鉅宗光世其爵統四大府兵政霜嚴節制涖止宜竦其瞻斧斤山林梁棟柱礎以埏以植隆闢帥宇仁里斯美宅必處仁志在仁武熊羆化馴優游清暇退集燕室延訪賓友志廣忠益煌煌聖朝武緯文經崇室邃奧式永攸寧翰林侍講學士中奉大夫知制誥同修國史李昉魯翀撰

普濟宮重建麻衣子神宇銘

距穰西百里而遠有山曰靈堂古麻衣子棲真之跡在焉學道者狀其事云子出沒晉宋間今餘千年其間或有因其跡而繕宮室弘道法者皆軼不紀今太易道人毛守朴

齟荆棘侈土木一新之慨然曰仙聖之跡失今不錄將遂
顛絕千載之下不有能筆孰開厥靈奉狀摯狎委筆焉徵
狀麻衣子姓李氏名和字順甫後際神人更志康字惠和
自號麻衣子貞觀間封惠慈廣德普濟真人真人世居秦
父思溫西寧令呂穆帝昇平元年春二月十有五日生真
人而紺髮美姿膂力絕等然性明慧好經史契悟玄要而
綽有才譽孝武太元九年時年二十有八喟然太息曰吾
年如此猶湛穢腥腐愚亦至矣以學道之志告親請去西
寧君責留之不爲止君曰吾爲汝築別室聽汝所欲爲何
如不答陰入祈口坐一巖間彌月人不知君偕親黨求之
遂深入結廬居之西寧君迹見曰吾老矣職則汝襲無苦
爾爲也不荅令親黨逼之不起嘗獨行終南逢一道者藜

杖芒屨狀貌厖古倚阜危坐謂真人曰吾久汝候矣揖與
語皆道祕也由是神悟劃然道者授以祕訣戒曰終南非
汝宅也南陽之間湍水之陽直乾之方有山靈堂石峒其
旁神開汝鄉汝則往之當有異人率衆拜汝汝慎拊之可
以翕神功於蒼茫問姓名道者曰吾左玄太極也言訖不
見真人神其言往求靈堂於湍陽者久之莫曉所在道遇
樵者相與問答所自來及所欲往樵者欣然導至峒門問
樵何居曰此山俄頃化去乃益喜自是坐峒十有九年時
安帝義熙十年夏大旱居民張奭約衆計曰麻衣子有道
者也盍往叩之衆諾相率詣峒焚香置水於前禱之真人
初坐瞑目頃之顧曰何爲者衆以早請讓却之衆日旦暮
請不輟真人苦拒者亦累日將夕有少年十許輩前請曰

人日紛紛何也真人語以其故少年請但許之真人託以
昧妄不敢諸少年復堅請真人怪諾之翌日如諾雨果大
至霽行山間見十有二人睡山陰熟睇之皆負龍狀心異
之還峒而十二人至皆稽顙曰吾屬龍也所居之溪曰巫
峽曰五雲曰岷山曰清遠曰桐松曰墻塚曰崑崙曰武陵
曰苧羅曰滌溪曰浣沙曰澗池上帝以師道業有成敕令
輔師行化耳真人稽首帝居而推峒居龍別占一穴龍自
峒入雲霧晦冥雷電交作抉裂山背各潰一穴而去真人
後游鄖鄉歷宋孝武大明元年真人行年一百有一矣秋
八月八日白鶴翔集祥飈霽雲蔚燁扶護真人儼坐而逝
鄖人卽其地築觀名以白鶴仙墳存焉唐貞觀十三年天
子制表山曰石門靈堂峰曰顯聖峒曰勝泉龍皆封公曰

廣潤洪潤咸潤慈潤靈潤施潤崇潤豐潤應潤慈潤顯潤
保潤封真人曰惠慈廣德音濟真人旌宮曰普濟果爾則
太宗以邁往之君首勅大業賜神號於宇內而於麻衣子
之所宮褒奉殊特則靈堂道區古勝地也自後泯不可稽
豈山川之運自有盛衰道自有汙隆人之爲事者或成或
否學道者或斷或續操著述之任者或工或拙或足以傳
或不足傳而至然邪皆無由知之今守朴挺然自奮於千
載湮圯之餘追麻衣子之道於蒼莽寥落之際而振褻之
平居則有水泉之利亢極則有膏澤之請一方之民將神
明其所爲十二溪之神物將集靈異於玄漠惟吾所令苟
幽明順指人神効績則推而達之清朝貞觀之褒有不必
取榮異代者翬嘗聞希夷子受道於麻衣道者豈度世不

死百世一下遨遊人間邪不然將兩麻衣邪或度世不死
滅沒六合徊翔故丘拊守朴之跡而歎其精心苦力能紹
其業也如此則守樸之籍丹臺上玉室也將有日矣於是
敘其事而銘之石銘曰

警虜真人挺跡有家咀道之腴土苴世華神人指迷大華
培塿靈堂崔嵬上列牛斗惟龍駢駢滅沒有無乃奉帝旨
爲吾卒徒窟宅八荒呼吸自我洶澤四施孰往不可悠悠
山雲鶴逝千載民之神之功猶不宰曰惟守朴跡遠心同
華觀峰出轉替呂隆泉流泓泓以溉以灌鬱亢呂請曾不
我捍有黔其首衆奔走之神眇莫覲守朴其師蒼琰穹窿
而刻斯語山英桓桓斥護終古

知許州劉侯民愛碑

至大元年秋奉直大夫許守劉侯既終更矣郡縉紳先生
田浦城劉興國

舊家望族郡人之父兄長者謀劓侯字

民之政於石屬筆小子狃懇讓不獲敢蹟侯行事誤次之
大德龍集乙巳夏六月侯下車家政斬然聞無雜謁其在
猷爲苟有利民無或不舉許北趾於汴南捐淮楚素號多
事侯材識精敏百務叢劇聲容舒徐刃嬰而節解吏無稽
牘獄無梃訟不尚苛猛而凜不可犯自公而優入則杜門
端晏游泳典籍出則賓禮先覺隆獎學校三時既隙則帥
郡屬叩校官請益經史親爲之倡繇是郡政翕然侯澤物
仁而有方耕鑿樹畜求底實效及終三年諸軍藪牧外丘
陵原隰墾闢殆盡初郊農貿穀市僧連郡豪徼糴外關擅
輕重以售孌弱胥困乃立斗斛市距州治重脅糴翔價之

法趨者如歸糴雖升合以上無敢摧劬民農兩利之侯以
事出法漸弛復襲舊至杖大馭數人法復立民頌歌之歲
丙午河南諸郡飢流瘠日至春穀價勃湧首發私庾大縮
價聽民糴募富民粟數萬石出糴市慮糴有不均也於諸
社責其長日閱數賦與之夏雨以麥得請出郡廩積年鼠
耗鑿米薄價紓民春夏徂秋無凋瘵者明年薦饑羸莩狼
戾請省出公緡賑之民爲蘇中統抵大德凡所立有司法
程討閱簿書彙帙度實而據守不踰故勇於拯民而善禦
其害省大核屯田臨穎鄧艾口民稻田三百頃人有說省
曰此古屯也可復築之下侯按實之侯按至元中司農研
水利拓民業隆平生息之道也業此率三四十一年暴取之
民措何地省不躓以兵民恫疾之狀迭陳不可卒止宣徽

歲遣使征羊馬法三十取一至則肆虐取人莫誰何度其
至今縣民大書其法於堊壁患遂止程約五縣繇賦齊均
凡出錢於縣官市物民間曰和買民產所有猶未易供無
之則估百倍賦官郡縣苦督責無敢拒貪肆者亦陰幸漁
獵雖瘡痍其民不恤侯深患之上有則均賦之苟無之抗
簡覆陳不允不止鄆陵扶溝產紅藍猝不時買萬鉅時其
地年歉而藍霧民大驚蹙省以侯敏幹略趣買之相其故
力請罷之是不獨仁於許又有以仁其鄰也省檄論囚荆
南時荆楚大水民饑歸請撤禁山澤以活危墊省移中書
如請民濟於阨是其澤不獨囿於近又有以及其遠也其
聽訟明察而果哀矜惻怛未始不行其間襄城南距湛河
與葉交壤葉民之鹽取解池齊鹽止襄舊樹石河之南塽

中州文表卷第三
其法酷矣之兩縣飛狀鬪辯葉引陝漕合攻襄中以危法
時侯偕省使者會決之卒以理摧葉復石舊疆民底寧河
南先民疎土曠田價至弱雖有質鬻而契券闊略鹵莽逮
今民日生集叢蓁灌莽盡化膏沃價倍十百鬪閱滋熾叅
吏蠹法孔穴焚出至有縣曠歲時而莫之決者侯既清白
復詳聽覽而洞情偽佑是懲非至未半歲決以百數訟爲
衰民葛英女嫁而奔人英蹟之獲他婦憚嚴其舅姑而私
竄外者寘家令妻教婿族事如其女返魂他屍者歸婿不
納一男子果爭之訟不決侯行縣詰之情立出民有以計
誣罣其同行者訟縣醉亡楮緡千獄逮人數十訊不白屢
愬州至據地以慟覘色詐立屈之決囚南陽主婦告奴酖

其夫三日死榜楚極憮毒獄久不立侯讞曰實有毒立死
無少緩者簡孚獄供有寃立貫之其聽決多此類也舊水
旱禱祠桑門羽流雜巫覡囂喟無益一不取齊被精壹以
走羣望靈貺昭荅嘗春旱禱八龍井明日雨大作民有擁
香拜舞治所者人旣德侯侯善使人而知所務長社尉解
僻遠爲創築近郡治使與庫傳狴犴相連峙徼循捍衛弭
患無形三皇肇立民極今天下通祠而舊郡祠陋不構新
之崇葺廟學植檜栢六十四本築室藏善購塑工體先賢
貌影自濂溪及紫陽朱子像而祠於學故實凡相交承則
帥案屬厚贐禮去者於侯又最豐終讓郤之始終銖髮無
取及是人益信在政睦睦嶽牧風紀屢倚用之軋強鋤暴
在人所不敢爲侯不憚也將退政之日其下讐伏如甫至

談者偉異之名聲籍籍上游諸公多譽籍之交剡騰薦不
一二數士論偁奉法恤民有古良二千石之風知言者是
之侯名天孚字裕民家大名以國書生從事中書出判東
平移漕司擢知冠州遂遷許風岸蘄立器度凝遠春秋方
強摠用未既加忠孝豈弟出天稟能以學濟之淵乎莫測
也浦城名九疇興國名庭瑞皆仕焉而已者聲實素著郡
人望所推先郡既不忍弭忘侯德兩公倡帥之人彌咨歎
其公云翀既敘其詳乃最而詩之庸冀郡人寥邈之思辭
曰

郡侯繩繩三歲逆旅孰莫我矜侯吾父母我饑我寒燠我
舖我鳴柚於家田墾在野繫我窘躓均恫其身膏以雨澤
煦我陽春惟古立學定民之命治有本末禮樂刑政誰蔑

棄之謂能其官我侯至止德馨如蘭士蒙顛顛侯教載之
縉紳煌煌侯勞來之孰匪人哉而玩侯法將薙芟之我用
是恕善達而施天下之兼寧獨吾私一郡是淹車聲麟麟
民莫侯攬有堅其珉鑄配琬琰鼎鼎其來疇允侯蹟跂予
望之其永無極

安氏尊經堂銘

明明尊經安氏堂之用有儆惕予其銘之於在古昔挺起
神聖越紹上帝昭我明命暨蒼源氏四術廼崇詩書禮樂
順古範鎔文武道衰四教崩弛孰其救之天縱夫子龍馬
獻圖用著著策吉凶悔吝開我人則二禪三繼曰帝曰王
典謨訓誥明我天常志欲有言形於詠歌雅頌得所神人
以和王綱失維列侯遞霸其敢僭踰筆討無赦是謂四府

其用不窮大禮升降汗隆宇宙有經終古莫忒民無
能名功載人極鼎鼎儒者相與守之孰吾堯桀相與培之
曾子思孟荀董王韓周程張朱以達聖元不息不泯皇衷
民彛其有能奮立百世師安氏東垣世以儒名味道之醇
服義之精百氏諛聞寧不有當處宜下陳經無二上至小
無內至大無外晦不加感顯不加泰風雨震凌併蒙是屋
六籍鳳峙疇匪雌伏安父之嗣伯仲叔季穉子齠孫繩繩
繼繼豈徒藏之斯務明之豈徒尊之斯務勤之其徒之賢
蘇伯修甫將以所聞往相告語多岐亡華克敬克念無或
怠墮請以銘鑑

鎮平縣尹劉侯遺愛之銘

今至元三年歲次丁丑冬鎮平縣尹劉侯代去校官朱秉

誠耆舊楊仲賢梁國英士李昌祖等來曰侯以元統二年
冬涖縣審荒蕪課耕懇稅丁戶均差徭察事情靖囂闕獎
士類隆風化集流散遂生養嚴法令弭偷剽始至決訟百
餘皆當愬日稀簿甲不紊里社耕學日修捕邏日謹穴剽
日戢三皇宣聖廟廡敞圮俎豆諸生廢弛者日修舉遂暇
無事他所赴愬憲部府廷者用侯推決剖析無滯農書刻
布民社曉耕植繭穀果蔬歲日增常平義倉之儲歲日裕
墾田歲日廣貫戶歲日衆憲暨守皆剡薦廉約清畏自始
及代無私謁衆日信將刻石永思以示不忘敢請予曰吾
故人也知其才惠政如此其可辭侯名益謙字恭甫潁州
太和人以蘄黃府史入憲自淮荆三道掌書除萬億寶源
提控案牘擢河南行省理問所知事秩將仕郎選充本省

掾史尹縣棗陽秩承事郎尹是縣剛毅明果奉公忘私其天性然也因摭所聞系以詩其辭曰
綿亘宛境跨帶穰邑大山盤互源泉悍急鎮曰陽館民牧且耕金季置縣始號鎮平至朝開濟分布諸侯之此遙署襄府樊州中統至元遷易守令稽考事宜始復縣政令長相因六七十年豈無惠愛留此郊鄣誰如劉侯慎終如始清已仁民懷古君子今其去矣日月有恒既挽莫及而借莫能斯琢貞珉刻頌嘉績庶幾見聞追慕無極

記序

大元通制序

至治二年冬十有一月皇帝以故丞相東平忠憲王之孫中書左丞相位右丞相總百官新庶務徵用老成開明治

道皇元聖聖相繼百有餘年宸斷之所予奪廟謨之所可
否禁頑戢暴仁恤黎元綽有成憲然簡書所載歲益月增
散在有司既積既繁莫知所統挾情之吏用譎行私民恟
政蠹臺憲屢言之鼎軸大臣恒患之仁廟皇帝御極之初
中書奏允擇耆舊之賢明練之士時則若中書右丞伯杭
平章政事商議中書劉正等由開創以來政制法程可著
為令者類集折衷以示所司其宏綱有三曰制詔曰條格
曰斷例經緯乎格例之間非外達職守所急亦彙輯之名
曰別類延祐三年夏五月書成勅樞密御史翰林國史集
賢之臣相與正是凡經八年事未克果今年春正月辛酉
上御樓殿丞相援據本末奏宜如仁廟制制可於是樞密
副使完顏納丹侍御史曹伯啓判宗正府普顏集賢學士

欽察翰林直學士曹元用以二月朔奉旨會集中書平章政事張珪暨議政元老率其屬衆共審定時上幸柳林之辛巳丞相以其事奏仍以延祐二年及今所未類者請如故事制若曰此善令也其行之繇是堂議題其書曰大元通制命狎序之狎惟聖人之治天下其為道也動與天準其為法也粲如列星使民畏罪遷善而吏不敢舞智御人鞭笞斧鉞禮樂教化相為表裏及其至也民協於中刑措不用二帝三王之盛盡於此矣雖刑罰世輕世重而士制百姓於刑之中以教祇德古之制也聖朝因事制宜因時立制時有推遷事有變易謀國之臣斟酌損益以就中典生民之福也仁廟開本於先繼志於今萬世慮也雖然明罰敕法朝廷之道揆在焉惟良折獄哀敬折獄有司之法

守親焉源則濬矣流斯承之可不慎歟

張文忠公歸田類藁序

聖朝牧菴姚文公以古文雄天下天下英才振奮而宗之卓然有成如雲莊張公其魁傑也公自弱齡以才行名縉紳間仕於朝盡讜言行直道自禮部尚書參議中書請謁親濟南俄以吏部尚書召親疾終喪省臺奏召至再至三至五六不起文皇即位關陝以西兵侵旱厲民莩政荒拜行臺中丞迺起西馳及秦民四流亡耄褲子遺若鼎魚筏蟻天毒方熾湯沸泉溢吏亡猖蹶日瞠神駭莫克拯拔公懇悃率倡務用仁術官帑不繼傾已囊橐日不勝給每每大慟民僅蘇復公疾薨天子聞之惻然閔悼贈摠誠宣惠功臣陝西等處行中書省平章政事柱國追封濱國公諡

文忠中外嗟惜無何神使憲陝西士民談道琅琅耿耿未
始不悽愴以聽之秦人悲思樹石刊頌不忘公質厚剛毅
正大明白仁於家忠於上確信不渝已善不伐人之善推
獎若不及其文淵奧昭朗豪宕妥帖其動盪也雲霧晦冥
霆砰電激其靜止也風熙日舒川嶽融峙綽有姿容闢翕
頓挫辭必已出讀之令人想像其平生千載而下凜有生
氣不可摩滅斯足尚矣公素知神其子引偕其婦翁吳肅
彥清持公所輯歸田類藁三十八卷徵序因書其概如此
公諱養浩字希孟雲莊其自號也行業履歷家乘國史有
載茲不容贅元統三年龍集乙亥二月甲寅朔中奉大夫
江淞等處行中書省參知政事字木魯神序

詩頌

范墳詩

宋蜀郡開國公范鎮景仁諡忠文其一世盛德偉烈光著
史籍人固知之其葬在襄城汝安鄉推賢里載東坡集中
甚詳襄城故隸汝州神來訪問故老其墳儼然故在已為
野夫豪農耕為禾黍之區矣范氏當金季猶有居墳左者
自經兵燼不知所存拊事歎閔故為作詩以記其概幸在
官君子知其為先賢遺壠庶有以處之

忠文峨嶒英始也跡甚微堂堂葦簡肅禎隼西南飛其人
古廉守肯持蒟醬肥所得一偉人天下大布衣引以賓王
家光映春宮闈昭陵宋仁主前星久無輝犯諱言所難雷
電每霽威雄哉鍊石手妙補天巍巍丞相江南來雲掩扶
桑暉舊德陳苦辭往往阨謗譏諸賢抗章疏弱卒攻堅圍

公力幹禹鼎正氣砮黃靡荆舒憤至骨斥語筆自揮贈之
以蕙蘭何往無芳菲時公與司馬聲諧玉琴徽解冠挂神
武甘老西山薇九寓日督督赤子將疇依兩公幸無恙起
拯或庶幾嗣君元祐初痛洗前人非民望屬司馬欲邀天
為鞶帝命起公臥門久車停駢君實了吾事此外何所希
清風溢寰海不啻嚴陵磯公既晚家許道德人所非襄城
卜封竈汝潁皆京圻我來訪遺壠名姓存依稀來仍散兵
燼雨雪無留霏公名在天下豈逐薤露晞誰能禁耕牧盛
事乘新機吾力不足振感歎徒歔歛

駐驛頌

繼天體道敬文仁武大昭孝皇帝即位修明世祖皇帝隆
平故事以故東平忠憲王之孫司徒忠簡王之子拜住承

相中書至治元年詔若曰忠憲弼我世皇功在社稷德在
生民其敕詞臣即王所有范陽采地朔南康莊碑之昭示
悠久冬刻銘既完十有二月丞相承詔薦事凡犒工勞衆
郡邑無所擾饋賀無所受天子遣使牲牢之饗秬鬯之禋
數異禮隆不一而止父老聚觀或至感泣明年春正月帝
幸涿州至碑所重瞳凝竚顧瞻有懷秋九月幸易州還丙
午帳殿碑垣之南駐輦御殿上顧丞相若曰汝祖考之績
之盛世載帝室維朕不忘亦惟汝之賢有以相朕益懋世
德故也丞相頓首謝翌日既旦太官饌已上步入帳殿御
金椅座碑右丞相稱觴獻萬歲壽從臣以次進觴天顏和
怡甚久迺去丞相諭翀曰皇上眷我祖考至此不刻以志
則未有以稱汝其銘之翀祇栗奉命用敢敘曰太祖皇帝

開創大

王孔温

哇太師魯國忠

華

定疆宇繼世國王皆著大功忠憲王

有八嶷然以鉅德大人相世廟統

度底

雍熙仁覆天下以垂大猷以迪來哲皇上念垂統之艱難
守成之不易懷往烈

聖度

非一介臣能窺萬

一敢即所聞見而獻頌曰

赫赫聖明嗣大寶位

紹我皇制慨想先正孰佐

我家奄奠八紘帝

我大祖疆理萬國忠宣忠武

功高輔翼雲雨方

掃華夏之民國王蔭葆巍巍

世皇幅幘既同

成治隆忠憲之功奕奕忠憲虎變莫測

年未及冠

著明烈端冕正笏不動聲色備傑在職儒碩

在廷何昧不昭何墜不舉何絕不紹何遠不緒三十年間

再秉鈞軸天極地

孰匪亭毒至元始終中外人心大耄

齟童締慕至今天日清明終古莫晦柱石廟廊宗社永賴

相國今誰忠憲涓嗣民之望之忠憲是繼克繼克庸滋益

光大一以至公熙我天載帝謂侍臣丞相之賢家世所因

其敕詞垣于忠憲勲大侈以文配永河山以竦見聞涿鹿

范陽王有采食山川蒼蒼北拱帝極蛟螭盤拏大鼇負之

德音不廟神訶護之六龍翱翔馭日霄漢再狩郊垌日此

銘篆淵鑑昭回駐驛永懷廓清煙霾以霽九垓從臣焜煌

千乘萬騎能不激昂以勵忠義世世夔契生此德門君臣

道合豈徒示恩忠憲來雲源源裔裔臣頌茲刊丕告無既

附錄

昌按元史文靖公為學一本於性命道德而記問宏

博文章簡與典雅深合古法用是天下學者仰為表
儀居國學最久自許文正公後以師道自任惟耶律
有尚及公而已有文集六十卷今多不傳子遠死於
忠遠婦死於節一門之美有足尚焉昌至鄧州閱士
籍得其後之習業於官者狎自稱皆叅政家云昌在
菊潭識

中州名賢文表卷第三十



